

萬有文庫

第二集七百種

王雲五主編

大方廣佛華嚴經

(九十)

實叉難陀譯

澄觀撰述

商務印書館發行

大方廣佛華嚴經

(九十)

實叉難陀譯
澄觀撰述

國學基本叢書

大方廣佛華嚴經疏鈔會本卷八十三

十迴向品第二十五

佛子。云何爲菩薩摩訶薩無盡功德藏迴向。

疏第五無盡功德藏迴向。長行中亦二。先明位行中亦三。今初牒名徵起。由緣無盡境。行迴向故。成無盡善根功德之行。得十無盡藏之果。從能迴及果行受名。或無盡功德之藏。或即藏通二釋。以迴向望行。迴向爲能藏。無盡功德是所藏。以因望果亦然。並有財釋。本業云。常以三寶授於前人。故名無盡功德藏。此義亦通所迴善根。卽以五門善根迴向。而爲其性。

疏第二依微廣釋中三。初明所迴善根。二明迴向之行。三結行成德。今初文有八句。初三可知。四聞法修證。屬於勸請。以對佛親請。必聞法故。後四皆隨喜。然依離垢慧所問。禮佛法經。總有八重。一供養佛。二讚佛德。三禮佛。餘卽五悔。或合禮讚。或略供養。或但爲五。以發願迴向。但總別之異。如十住婆沙。今文依此。迴向在於下文。故此有四。或但爲三。故智論云。菩薩晝夜三時。各行三事。謂懺悔。勸請。隨喜。行此三事。功德無量。轉得近佛。若依善戒經。但有二事。謂懺悔迴向。皆隨時廣略。鈔初三可知者。卽經列五也。一懺悔。二禮敬。三勸請。四隨喜。五迴向。迴向在後。然昔有別章。六門分別。一說多少。二釋名。三出體。四釋相。五明益。六問答。今並具之。但略出體。總分爲三。初明開合。卽彼多少。二釋文。卽釋名。辨相。三料揀。舍餘別門。今初初爲八行。然依離垢等者。唯一卷經。大旨如常可知。二或合禮讚。卽是七門禮。

讚俱是所依懺主故。三或略供養。卽但爲六。供養亦屬佛故。四或但爲五。以迴向發願。但總別之異者。二俱是願。迴向是總。發願是別。別發願故。如十住毘婆沙者。卽第三初明。至第四方懺悔。卽今晨朝前。四悔是第五發願。卽涅槃經闍王發願。後人安之。五今文依此。則同上有五六。或但有三。卽智論第七也。七若依善戒。卽合爲二。以禮讚是懺所依。依人德故。迴向攝願。亦攝隨喜勸請。故結云。隨時廣略。又隨時者。看臨期時。應用廣略。然晝夜三時。不宜闕也。

佛子。此菩薩摩訶薩。以懺除一切諸業重障。所起善根。

疏然懺名陳露先罪。悔名改往修來。除惡業障。故須懺也。然懺有二種。若犯遮罪。先當依教作法悔之。若犯性罪。應須起行。此復二種。一事行。如方等經。及禮佛名等。二依理觀。謂觀諸法空。如淨名說。當直除滅。勿擾其心等。若依普賢觀。及下隨好品。皆具事理無礙之懺。至下廣明。鈔然懺名下。第二釋文。卽釋名辨相四事。卽爲四段。今初釋懺悔。先釋名。懺悔二字。古有二釋。今疏卽天台釋。亦通漢梵二者。今釋卽半梵半漢。懺者。梵云懺磨。此云請忍。悔卽此方體。是惡作。厭先過失。求請三寶。忍受悔過。單云悔者。非是。六釋合二。卽是依主。除惡業者。此辨懺益。亦懺意也。然懺有二下。卽辨相也。如方等者。經中令先嚴淨道場。香泥塗地。及室內外。作圓壇。彩畫懸五色幡。燒海岸香。燃燈敷高座。請二十四尊像。多亦無妨。設餽饌。盡心力。須新淨衣鞋履。無新洗故。出入脫著。令無參雜。七日長齋。日三時洗浴。初日供養僧。隨意多少。別請一明了內外律者爲師。受二十四戒。及陀羅尼呪。對師說罪。要月八日。十五日。當以七日爲一期。此不可減。若能更進。隨意堪任。十人已還。不得出此。俗人亦得。須辦單縫三衣。備佛法。

式。旋繞一百二十匝。卻坐思惟等。廣如經說。佛名經常所見聞。如淨名。卽優波離。章波離。白佛。憶念昔者。有二比丘。犯律行以爲恥。不敢問佛。來謂我言。我等犯律。誠以爲恥。不敢問佛。願解疑悔。得免斯咎。我卽爲其如法解說。時維摩詰來謂我言。唯優波離。無重增此二比丘罪。當直除滅。勿擾其心。彼罪性不在內。不在外。不在中間。心垢故。衆生垢。心淨故。衆生淨。心亦不在內。不在外。不在中間。如其心然。罪垢亦然。諸法亦然。不出於如。如優波離。以心相得解脫時。寧有垢不。我言不也。維摩詰言。一切衆生。心相無垢。亦復如是。唯優波離。妄想是垢。無妄想是淨。取我是垢。不取我是淨。顛倒是垢。不顛倒是淨。一切法亦如是。如夢如燄。如水中月。如鏡中像。以妄想生。其知此者。是名奉律。其知此者。是名善解等。卽一向理觀。以訶事也。若普賢觀者。初令晝夜六時。對十方佛。普賢菩薩。徧懺六根。卽事懺也。復令觀心。令此空慧。與心相應。卽是理懺。如前釋毘盧遮那。已引經竟。今時常用一切業障海。皆從妄想生等。卽彼經後總偈。皆事理雙明。隨好品意。至下當知。

禮敬三世一切諸佛。所起善根。

疏言禮敬者。除我慢障。起信敬善故。勒那三藏。說七種禮。今加後三。以成圓十。一我慢禮。謂依次位立。無敬心故。二唱和禮。高聲喧雜故。此二非儀。三恭敬禮。五輪著地。捧足殷重故。四無相禮。入深法性。離能所故。五起用禮。雖無能所。而禮不可禮之三寶。一一佛前。皆影現故。六內觀禮。但禮身中法身佛故。七實相禮。無內無外。同一實故。八大悲禮。前雖有觀。未顯爲生。今一一禮。普代衆生故。九總攝禮。總攝前六爲一觀故。十無盡禮。入帝網境。若佛若禮。重重無盡故。鈔言禮敬者。此牒第二行經文。除我慢。

下疏釋初明行益。以我慢故不能禮敬。今摧我慢山。卽是除惡。起信敬善。卽是成德。二皆行益故。勒那下卽辨相也。前七是三藏意。後三疏以義加略。無釋名。以易知故。然三恭敬禮云。五輪著地者。離垢慧經云。一一發願。初總願云。我今五輪於佛作禮。爲斷五道。離於五蓋。願諸衆生常得安住。不壞五通。具足五願。願我右膝著地之時。令諸衆生得正覺道。願我左膝著地之時。令諸衆生於外道法不起邪見。悉得安立正覺道中。願我右手著地之時。猶如世尊坐金剛座。右手指地。震動現瑞。證大菩提。我今亦爾。共諸衆生同證覺道。願我左手著地之時。令諸衆生離諸外道。難調伏者。以四攝法而攝取之。令入正道。願我首頂著地之時。令諸衆生離憍慢心。悉得成就無見頂相。餘義可思。

勸請一切諸佛說法。所起善根。聞佛說法。精勤修習。悟不思議廣大境界。所起善根。疏言勸請者。名爲祈求。除謗法障。起慈善根故。聲聞自度。但懺己罪。菩薩愍衆。故須勸請。但勸如來普雨法雨。則自必需洽。此文略云。勸佛說法。智論復加請佛住世。占察經中亦請菩薩速成正覺。次句因聞法故。起悟入善。言修習者。瑜伽八十三云。修者了相作意。習者勝解作意故。又修者於所知事而發趣故。習者無閒殷重。修加行故。鈔言勸請者。此牒第三行也。下疏解釋除謗法下。先明成益。聲聞自度。下來意。智論復加者。如十住毘婆沙亦請住世云。十方一切佛。現在成道者。我請轉法輪。安樂諸衆生。十方一切佛。若欲捨壽命。我今頭面禮。勸請令久住。占察經者。經具五懺悔。勸請云。唯願十方一切菩薩。未成正覺者。願速成正覺。已成正覺者。願常住世。轉正法輪。不入涅槃。釋曰。卽具三也。次句因聞下。卽經自辨勸請成益。了相作意等。卽七作意義。如三地釋。

於去來今一切諸佛。一切衆生所有善根。皆生隨喜。所起善根。去來今世一切諸佛。善根無盡。諸菩薩衆。精勤修習。所得善根。三世諸佛。成正等覺。轉正法輪。調伏衆生。菩薩悉知。發隨喜心。所生善根。三世諸佛。從初發心。修菩薩行。成最正覺。乃至示現。入般涅槃。般涅槃已。正法住世。乃至滅盡。於如是等。皆生隨喜。所有善根。

疏言隨喜者。爲慶悅彼故。除嫉妒障。起平等善。然十住智論。皆有三位。一諸佛善。二二乘善。三人天善。今文四句。初一總明。具於三善。二乘正是所訶。故不別舉。而含在一切衆生之中。次三句別。其第二句。別明三善。結一隨喜。後一隨喜。諸佛因果。鈔言隨喜者。此明第四行也。爲慶下先釋行名。然十住下。三辨相。然智論多同。十住婆沙論云。所有布施福。持戒修禪定。從身口意生。去來今所有。習學三乘人。具足一乘者。一切凡夫。福皆隨而歡喜。釋曰。其初三句。通三世佛也。

疏大品隨喜品。明大千海水。一毛破爲百分。滴取海水。可知其數。隨喜之福。不可知數。法華展轉第五十人。尙難投量。況初隨喜。此據隨喜如來權實功德。其福更多。鈔大品隨喜下。重示隨喜成益。卽上平等功德。初引大品。卽第十七法華展轉。卽第六經隨喜功德品第十八爾時彌勒菩薩白佛言。世尊。若有聞是法華經隨喜者。爲得幾所福。經答文廣。今當略引。謂有人於會中。聞是法華經隨喜已。從法會出。至於餘處。轉爲人說。是第二人聞已。復轉爲第三人說。如是展轉。至第五十。其第五十善男子善女人。所得功德。今當說之。若四百萬億阿僧祇世界。六趣四生。充滿其中。有人求福。一一衆生。與滿閻浮提金銀琉璃瓊瑤瑪瑙珊瑚琥珀。乃至象馬車乘。奴婢人民。七寶樓閣等。比第五十人聞法華經隨

喜功德百分不及一。乃至算數譬喻所不能知。下結云。何況最初於會中聞而隨喜者。釋曰。此顯功德多。此據等者。疏出德多。所以大品但通明隨喜之福。今就所隨喜中。分其勝劣。勝境隨喜。其福更多。言權實功德者。卽是法華經。故經云。此法華經開方便門。權也。示真實相。實也。如來智慧甚深無量。實也。其智慧門。難解難入。權也。於一佛乘。分別說三。從實開權也。會三歸一。會權歸實也。世尊法久後。要當說真實。實也。佛以方便力。示以三乘教。權也。故二十八品三周之文。但顯如來權實知見。昔人云。此華不有則已。有則華實雙合。此經不說則已。說則權實雙辨。明知法華不出權實功德耳。旣窮終極。唱難信難解。今能隨喜。故德難量。最初聞人。近獲六根清淨。遠則速成佛果。故云其福更多。

疏然佛是除罪勝緣。故與懺悔前後無在。旣淨身器。次希法雨。後攝他同。已迴向三處。不墮三界。及與二乘。然禮等五果。通得菩提。別則懺得依正具足。禮則尊貴身器具足。勸請得慧。隨喜得大眷屬。并大財福。迴向離邪。常遇佛世。常能修行。約教不同。可以思準。鈔然佛是下第三料揀。於中曲有三門。一明次第。然禮等五果。下二辨果報。約教下三約教揀定。言可思者。如前禮佛十重。初二非儀。令其知非。故辨之耳。三通權小。四是始教。順空義故。五是終教。通事理故。六七頓教。但禮心佛。無禮禮故。八通終教。同教一乘。故後三合成圓教。八是能禮一具一切故。九融深淺。事隨理融。事事無礙。故而言攝前六者。二非儀。故十重重無盡。故下經云。一毛孔中。悉明見。不思議數無量佛。一切毛孔皆如是。普禮一切世間燈。舉身次第恭敬禮。如是無邊諸最勝。亦以言辭普稱讚。窮盡未來一切劫。一如來所供養具。其數無量等衆生。又普賢行云。於一微塵中。見一切諸佛。菩薩衆圍繞。法界塵亦然。一一如來所。一切刹

塵禮等。若依此禮。一禮則無有盡。功德豈可量哉。餘之七門。可以思準。不入斯觀。徒自疲勞。菩薩如是。念不可說。諸佛境界。及自境界。乃至菩提。無障礙境。如是廣大無量差別。一切善根。凡所積集。凡所信解。凡所隨喜。凡所圓滿。凡所成就。凡所修行。凡所獲得。凡所見覺。凡所攝持。凡所增長。

疏第二菩薩如是。下明迴向行中。二先結前善根。後悉以下。正明迴向。前中二初橫結上來。及不可說者。後凡所下。豎結前善。謂隨前一善。皆有積集等故。具足爲圓滿。學成爲成就。證入爲獲得了。性爲覺知。餘文並顯。

悉以迴向莊嚴一切諸佛國土。

疏二正明迴向。於中二。先迴向善提。後迴向衆生。前中二。先明隨相。後明離相。前中亦二。先正起行願。後結行成益。前中又二。先迴向淨土。後總攝迴向。前中亦二。先明衆寶莊嚴。後明人寶爲嚴。汎論嚴淨。有其三種。一處所淨。二住處衆生淨。卽前二段。三法門流布淨。亦名受用淨。徧上二段。又此二段之中。具足十八圓滿。今初有二。初總標所成。鈔又此二段等者。此十八法。華藏品中已具列釋。今經文具疏。但隨文配屬。難則釋之。今鈔重依彼經論。牒經配屬。論云。經曰。薄伽梵。住最勝光曜。七寶莊嚴。放大光明。普照一切無邊世界。此上顯色圓滿。無量方所。妙飾閒列。形色圓滿。周圍無際。其量難測。分量圓滿。超過三界所行之處。方所圓滿。勝出世間善根所起。因圓滿也。最極自在淨識爲相。果圓滿也。如來所都。主圓滿也。諸大菩薩衆。所共雲集。輔翼圓滿。無量天龍人非人等。常所翼從。眷屬圓滿。廣大法味。喜樂所持。住持圓滿。作諸衆生一切義利。事業圓滿。滅諸煩惱。災橫纏垢。攝益圓滿。遠離衆魔。無畏。

圓滿過諸莊嚴。如來莊嚴之所依處。住處圓滿。大念慧行。以爲遊路。即路圓滿。大止妙觀。以爲一乘。乘圓滿也。大空無相無願解脫爲所入門。門圓滿也。無量功德衆所莊嚴。大寶華王衆所建立。依持圓滿。大宮殿中。論曰。此顯如來住處圓滿。謂佛淨土。由十八圓滿淨事故。說名圓滿。次列十八圓滿竟。下結云。如是十八圓滿所莊嚴宮殿。名佛淨土。佛住如是。大宮殿中。說此契經。釋曰。下隨疏釋。依今經次。釋義。即彼論廣文。

如過去世無邊際劫。一切世界。一切如來所行之處。所謂無量無數佛世界種。佛智所知。菩薩所識。大心所受。莊嚴佛刹。

疏二如過去下。別顯嚴相。於中亦二。先舉三世土嚴。二願成彼嚴。今初亦二。先別明。二總結。前中三世。即爲三別。謂過未現在。而爲其次。今初分二。先總明。後別顯。今初先舉時辨處。次所謂下總標。世界種者。即方處閒列。如初會說。無量者。無分量故。無數者。數多故。佛智所知者。淨識所現。唯佛窮故。菩薩所識者。登地分見故。大心所受者。地前能受故。莊嚴佛刹者。即正顯示。此雖義當形色。意是總該。鈔今初下於總中。數多者。佛所莊嚴廣大刹。等於一切微塵數故。其中已有圓滿之相。如方處閒列。即方處圓滿。無分量。即分量圓滿。淨識所現者。謂賴耶淨識。現自受用土。第七淨識。現他受用土。餘五淨識。現變化土。唯佛窮者。八識轉智。唯佛窮故。登地分見。見他受用故。雖舍有別。意皆是總。

清淨業行。所流所引。應衆生起。如來神力之所示現。諸佛出世淨業所成。普賢菩薩妙行所興。疏二清淨下。別明有二圓滿。初辨因圓滿。謂出過三界淨土。亦有出過之因。然上世界成就品中。起具

因緣總有十種。生佛兼說。有淨穢故。今此唯五。欲同佛淨。故略衆生。鈔初辨因滿下總明。疏初句亦總亦別。總明三土之因。皆無漏業。故云清淨。自受用土。淨行所流。萬行生故。他受用土。及變化土。淨業所引。隨業現故。別則唯約受用。因緣所流。增上緣所引。故佛地論云。如來藏識中。無漏善根。爲因而生。有義。但是增上緣生。以外法故。有義。亦是因緣而生。親能生故。若不爾者。應無因緣。外法相望。非因緣故意。以後義爲正。言亦是者。通二緣故。有二感報淨土。以四塵種子而爲正因。親感土故。六度萬行而爲緣因。助成土故。或以自利後得而爲緣因。依此經宗。以一切波羅蜜行。隨其所應。依正二果。互爲二因。互相資辦。以皆是法性相應善根成故。常融常別。餘如世界成就品。下四唯別。初二變化土。因初句約爲緣義。後句約爲因義。次句是自受用因。故云出世淨業。後句義兼自他受用土。因登地已上。皆修普賢之妙行故。又此妙行。卽圓融因。融上諸土。無障礙故。鈔初句亦總下別。別有五句。初句亦總亦別。卽清淨業行所流所引。亦總下中。自利行業。親招爲所流。利他行業。與物爲緣。故云所引。故釋云。隨業現故。此業卽是所化者業。以菩薩衆生之業爲因。親感他受用變化之土。如來利他爲增上緣。隨他衆生之業成故。故云引也。泉能成池。名爲所流。鑿池引水。水名所引。正同前世界品。引生公義。行致淨土。非造之也。造於土者。衆生類矣。別則唯約下釋。上亦別之言。於中三。初總明也。因緣親生。曰流。增上緣疎爲引。故佛地論下。二成立二因之義。此有三義。一唯立因緣。此已含二法。一如來識。二無漏善。合二爲因。亦同多聞薰習。與阿賴耶中解性合之爲因也。然引論猶略。若具。應云。謂大宮殿。用出世間無分別智。後得智善根爲因。而得生起。非是無因。非大自在等。而爲其因。乃至云。此用本來無。

分別智。後得無漏善法種子。三無數劫。修令增廣。爲此淨土變現生因。此佛淨土。如來識中無漏善根。爲因而生。則具修生本有二法。合爲因緣。二云有義下。出所以云。以外法故。謂以識生識。可是因緣。外生淨土。那是因緣。外土卽爲增上果。故是增上緣。三云有義下。雙立非謂但取因緣。亦取增上。亦取因緣。故云親能生故。出因緣義。若不下。反難成立。一切外法。皆因內法熏習爲因。明有因緣。故云不爾。應無因緣。無則非理。外法相望者。正成上義。第二師義。難第一師。汝以外法故。唯增上緣。外法則不得立於因緣。今謂外假內熏。明有因緣。若爾。內熏其外。既非自類。何名因緣。境全心變。卽八識相分。亦不離心。亦因緣矣。意以後義爲正。四疏家斷取也。兼顯是通二義。有云感報下。出二因體。四塵種子。全在識中。卽八識中相分種也。或以自利後得者。上言六度萬行。則通二利。此依唯識別義。以利他後得爲他受用。變化土緣。故用自利後得爲自受用土緣也。依此經宗下。正於前文。唯取自利爲自受用緣。故二利之行。同取他受用土。以皆下。出互通所以。故指如世界品。問明品中。亦已明。餘可思準。

一切諸佛於中成道。示現種種自在神力。

疏二一切下。事業圓滿。自能現作一切有情。一切義利故。如來雖卽是主意取義利。鈔自能現作者。

卽佛地論。但略其要。具足論云。如其淨土住持圓滿。作何事業。問也。作諸衆生一切義利。引經文總答。

也。謂如此中自能現作一切有情。一切義利。或一切有情自作義利等。然十八圓滿。皆初假問生起。次引經答。三以論釋文。皆約宮殿上明。今之所明。乃通說耳。以問易知。故並不出。

盡未來際。所有如來應正等覺。徧法果住。當成佛道。當得一切清淨莊嚴功德。佛土。

疏第二盡未來下。舉未來土嚴。文中二初總標。

盡法界虛空界無邊無際無斷無盡。

疏二盡法界下。別顯有九圓滿。文分爲五。一分量圓滿。此通二土。謂約自受用。從初得佛盡未來際。相續無變。橫周法界。故無邊際。約他受用。爲於地上。隨宜而現。勝劣大小。改變不定。但地前不測。言無邊際。登地常見。亦無斷盡。此文兼明方所圓滿。以方所有二。一自受用。周徧法界。於三界處。不即不離。故二他受用處。下文當辨。鈔從初得下。即唯識文。然論云。相續變爲純淨佛土。今無變字。乃是義釋。謂雖復相續。變化不同。他受用土。前後改轉。故不云變。橫周法界者。即唯識論前所引論。後云。周圓無際。佛地經中同佛地論。又云。無際者。謂無長短等分。齊相難測。故下說他受用。並如世界品。

皆從如來智慧所生。

疏二皆從如來智慧所生者。即果圓滿。自受用土。圓鏡智生。他受用土。平等智生。鈔即果下引鏡智等。即世界品佛地論云。以佛自在淨識爲相。

無量妙寶之所莊嚴。所謂一切香莊嚴。一切華莊嚴。一切衣莊嚴。一切功德藏莊嚴。一切諸佛力莊嚴。一切佛國土莊嚴。

疏三無量下。依持圓滿。故佛地經云。無量功德。衆所莊嚴。大寶華王。是爲依持。鈔佛地經下。三會佛地經。然彼論先問起云。如是淨土門。既圓滿。如餘宮殿。應有所依。故次須說依持圓滿。問起無量功德。衆所莊嚴。大寶華王。衆所建立。舉經答也。今疏引經云。爲所依持者。以先問後不引釋。故但結歸名。

疏今文中先總標妙寶。所謂下別列初三事。嚴中有蓮華。次二德。嚴初卽無量功德。佛力卽是能持。後一卽是所持之國。佛地唯據於事。但云蓮華。今通事理。故云佛力功德莊嚴。亦通事理。鈔後會彼論於中二。先出論意。以論廣釋。但約華故。論云。謂如地等依風輪等。或如世間宮殿依地。如是淨土無量功德。衆善所嚴。大寶紅蓮華。王衆所建立。卽紅蓮華大寶所成。如是大寶無量功德。衆善所起。於衆寶中。勝故名大。此寶紅蓮華。於諸華中。最爲殊勝。故名華王。或此寶華。望諸菩薩善根所起。紅蓮華最勝。故名爲大。佛法王是佛最勝善根所起。故名爲王。又此寶華極難得。故名爲大寶。華中最勝。故名華王。又此大華非一。或華蕊多。故名爲衆。釋曰。此則唯據事也。以將功德莊嚴。佛故。若將無量功德通理。則佛地亦有佛力任持。故疏云功德亦通事理。

如來所觀

疏四明主圓滿。鈔如來所觀者。全同佛地經論。釋曰。謂大宮殿。諸佛世尊爲主。非餘。以殊勝故。唯屬世尊。或唯屬世尊。住持攝受。非餘所能故。

不可思議同行宿緣。諸清淨衆。於中止住。未來世中當成正覺。一切諸佛之所成就。非世所觀。菩薩淨眼。乃能照見。此諸菩薩具大威德。宿植善根。知一切法。如幻如化。普行菩薩諸清淨業。入不思議自在三昧。善巧方便。能作佛事。放佛光明。普照世間。無有限極。

疏五不可思下。輔翼圓滿。復兼四種。文中分二。初總顯。則兼眷屬圓滿。眷屬謂人天八部。然皆菩薩化。作示淨土不空故。今但云諸清淨衆。則兼之矣。鈔輔翼圓滿。佛地論云。如是淨土。主旣圓滿。應有輔

翼主必攝受輔翼者。故彼經云。諸大菩薩。衆所雲集。論云。謂大宮殿。有無數大菩薩。僧所共雲集。諸來朝者。名爲輔翼。既有如是。大菩薩。僧常來輔翼。故無怨敵。能爲違害。諸聲聞等。無如是。事。眷屬圓滿。佛地經云。無量天龍人非人等。常所翼從。今文無此。故以諸衆攝之。然皆菩薩化作。示淨土不空。卽彼論釋妨。妨云。云何淨土。超過三界所行之處。而有天等。以爲眷屬。天等皆是三界攝。故答云。淨識如是。攝受變現。爲嚴淨土。故不相違。第一釋也。或爲成熟所化有情。示現如是。變化種類。第二釋也。卽阿彌陀經云。是諸衆鳥。皆是阿彌陀佛。欲令法音宣流。變化所作。論云。或諸菩薩。化作無量天龍等身。住淨土中。供養佛故。第三釋也。或自化身爲天龍等。翼從如來。是故無過。第四釋也。四義皆示不空耳。

疏後未來下。別顯勝德。兼三圓滿。初明方所圓滿。佛地經云。超過三界所行之處。今云。一切諸佛之所成就。通於自他受用。非世所覩。卽是超過菩薩能見。是他受用。受用方所。或說淨居。或說西方等。是鈔初明方所圓滿。此卽標名。論云。如是淨土分量圓滿。爲同三界。爲不爾耶。論假問也。超過三界所行之處。引經答也。論釋云。謂大宮殿處所方域。超過三界所行之處。非如三界自地法愛。執爲己有。所緣相應。二縛隨增。是彼異熟及增上果。如是淨土。非三界愛所執受。故離二縛。故非彼異熟增上果。故如涅槃等。超過三界異熟果地。乃至云。如是淨土。爲與三界同一處所。爲各別耶。問也。有義。別有處說。在淨居天。亦有處說。在西方等。有義。同處淨土。周圍無際。徧法界。故如實義者。實受用土。周圍法界。無處不有。不可說言離三界處。亦不可說卽三界處。若隨菩薩所宜現者。或在色界淨居天上。或西方等處。所不定。釋曰。今疏直用其要。兼取如實義耳。

疏二此諸菩薩具大威下。皆門圓滿。以三三昧爲所入門。此中初句顯門之因。知一切下。是空門相。行菩薩業。是無相門相。善巧方便下。是無作門相。入不思議三昧。通該前後。鈔以三三昧者。卽義引也。彼經云。大空無相無願解脫。爲所入門。故疏以下經配三門相。三昧通該前後者。該前明空等爲不思議三昧故。該後以三昧等爲攝益故。

疏三又此淨業。卽攝益圓滿。以離煩惱纏垢等爲攝益故。名爲清淨。鈔三又此淨業下。辨攝益相。彼經云。滅諸煩惱災橫纏垢。故論云。謂於此中遠離一切煩惱纏垢。及諸災橫。卽諸煩惱名爲纏垢。如是卽名諸災橫因。煩惱纏垢。此中無故。所作災橫。此中亦無釋曰。離此煩惱等。卽名攝益。又現證得解脫。煩惱災橫纏垢。殊勝福智。故名攝益。故疏指上淨業。名爲攝益。

大方廣佛華嚴經疏鈔會本卷八十四

現在一切諸佛世尊。悉亦如是。莊嚴世界。無量形相。無量光色。悉是功德之所成就。無量香。無量寶。無量樹。無數莊嚴。無數宮殿。無數音聲。隨順宿緣諸善知識。示現一切功德莊嚴。無有窮盡。所謂一切香莊嚴。一切鬘莊嚴。一切末香莊嚴。一切寶莊嚴。一切旛莊嚴。一切寶繪綵莊嚴。一切寶欄楯莊嚴。阿僧祇金網莊嚴。阿僧祇河莊嚴。阿僧祇雲雨莊嚴。阿僧祇音樂奏微妙音。

疏第三現在下。舉現在嚴中亦二。初總標。類同過未。云亦如是。二無量下別顯。有三圓滿。一者形相。卽形色圓滿。鈔無量形相者。彼論雙問云。如是淨土顯色圓滿。形相云何。引經答形色云。無量方所。妙色閒列。論釋云。謂大宮殿妙色閒列。無量方所。或大宮殿無量妙飾。方所閒列。言無量者。或殿無量。或處無量。妙慧爲光。安布爲飾。是故說名妙飾閒列。釋曰。無量相貌閒列。卽形色。

疏二無量光色。卽顯色圓滿。悉是以下。總以因結。鈔無量光色者。彼經云。最勝光曜。七寶莊嚴。放大光明。普照一切無邊世間。論釋云。謂大宮殿用最勝光曜。七寶莊嚴。或寶嚴故。最勝光曜。於此所重。且言七寶。其實淨土。無量妙寶。綺飾莊嚴。非世所識。故經云。無量光色。又論釋放大光明等云。謂大宮殿放大光明。普照一切無邊世界。或大宮殿其體周徧無邊世界。故放大光。普照一切。釋曰。彼經有其二句。今經云。無量光色。則已攝二。無量光者是彼放無邊光句。無量色者。卽初最勝光曜等。疏三無量香。下住處圓滿。於中有三。初總明住處。次隨順下。別顯處因。卽他受用因。故云。示現後所謂下。廣顯處嚴。

以超過一切菩薩。及餘住處。名處圓滿。鈔住處圓滿。彼經云。過諸莊嚴。如來莊嚴之所依處。論釋云。謂於此中。佛所住處。勝過一切菩薩。及餘莊嚴住處。唯是如來妙飾莊嚴。爲所住處。由勝彼一切莊嚴住處。是故說名住處圓滿。以超過一切菩薩。下卽彼論文。經顯處嚴。在文極顯。

如是等無量無數莊嚴之具。莊嚴一切盡法界。虛空界。十方無量種種業起。佛所了知。佛所宣說。一切世界。其中所有一切佛土。所謂莊嚴佛土。清淨佛土。平等佛土。妙好佛土。威德佛土。廣大佛土。安樂佛土。不可壞佛土。無盡佛土。無量佛土。無動佛土。無畏佛土。光明佛土。無違逆佛土。可愛樂佛土。普照明佛土。嚴好佛土。精麗佛土。妙巧佛土。第一佛土。勝佛土。殊勝佛土。最勝佛土。極勝佛土。上佛土。無上佛土。無等佛土。無比佛土。無譬喻佛土。

疏第二如是等下。總結三世嚴具及土。於中二。初總結能所嚴。後所謂下。別顯所嚴。有二十九種。隨體德用。立名不同。亦可并前總標。通結上來十八圓滿。隨勝立土。如理應思。鈔亦可并前等者。上來過去。有二。未來有九。現在有三。但有十四。下人寶中有五事業。分佛菩薩。遂卽重出。除重。十八云。何攝耶。今總標文。爲主圓滿。以言佛土故。別中二十九句。有十七圓滿。一莊嚴。二清淨。爲因圓滿。佛地經云。超出世界善根所生。今以清淨。故爲出世。以其莊嚴。爲所起嚴。萬善嚴故。三四事業平等妙好故。五卽是路。大念慧行。爲威德故。六七住處。廣大安樂。八卽輔翼。叵壞。九眷屬無盡。十分量無量。十一依持不動。十二無畏名同。十三顯色光明。十四無違。十五可愛。皆攝益圓滿。無煩惱災橫之違。故可愛也。十六照明。十七嚴好。皆果最極清淨。爲其相故。十八精麗。十九妙巧。二十第一。皆依持無量功德。衆所莊嚴。大

寶華王衆所建立故。二十一、二、三、四皆門圓滿。三解脫門爲最勝等故。二十五、六皆乘。大止妙觀爲無上等故。二十七、無等。二十八、無比。二十九、無譬喻。皆方所以徧法界。性不並真。無比對故。經旨多含。略爲此配。未必要爾。故疏略示。令如理思。

如是過去未來現在一切佛土所有莊嚴。菩薩摩訶薩。以已善根。發心迴向。願以如是去來現在一切諸佛所有國土清淨莊嚴。悉以莊嚴於一世界。如彼一切諸佛國土所有莊嚴。皆悉成就。皆悉清淨。皆悉聚集。皆悉顯現。皆悉嚴好。皆悉住持。

疏第二如是過去下。願成彼嚴於中二。先嚴一界。

如一世界。如是盡法界虛空界。一切世界。悉亦如是。三世一切諸佛國土。種種莊嚴。皆悉具足。

疏後如一世界下。例嚴普周。顯嚴分齊。令法界土皆具。三世一切莊嚴。旣一佛土卽具無盡莊嚴。則一嚴一切嚴。亦顯一圓滿卽一切圓滿。重重無盡。方是華嚴淨土圓滿。

佛子。菩薩摩訶薩。復以善根如是迴向。願我所修一切佛刹。諸大菩薩。皆悉充滿。

疏第二佛子菩薩至復以善根下。人寶爲嚴。同十大願中第七願也。亦卽是前輔翼圓滿。文中三。初總願所成。二其諸下。別顯嚴相。三願令如是下。結以嚴刹。

其諸菩薩體性真實。智慧通達。

疏二中文。二先願德齊。後願業廣。前中亦二。先正顯德。後結德嚴土。前中有二十句。初二總明體實智圓。

善能分別一切世界及衆生界。深入法界及虛空界。捨離愚癡。成就念佛。念法。真實不可思議。念僧無量。普皆周徧。亦念於捨。法日圓滿。智光普照。見無所礙。從無得生。生諸佛法。爲衆勝上。善根之主。發生無上。菩提之心。住如來力。趣薩婆若。破諸魔業。淨衆生界。

疏後善能下十八句。別顯於中。先明智慧。後深入下明體實。今初卽路圓滿。大念慧行。爲所游路。路卽道之異名。鈔大念慧行。爲所游路。卽佛地經文。言路卽道之異名者。是彼論釋。彼論具云。謂此中大念大慧。及以大行爲所遊履。故名遊路。是道異名。聞所成慧。名爲大念。聞已記持。無離義故。思所成慧。名爲大慧。依理審思。得決定故。修所成慧。名爲大行。由修習力。緣真理故。大者。念等緣大乘法而生起故。彼所攝故。履三妙慧淨土。往還。故名遊路。此說菩薩因三妙慧。得入淨土。故名遊路。疏文中。初明大慧。分別是權。深入是實。此是慧體。離癡慧業。成就念下。卽大念也。七念之中。略舉前四。七念如離世間品。後法日下。卽是大行。行卽修慧故。鈔七念等者。等常六念。加念衆生。深入法性。永離顛倒。善根大願。皆悉不空。

疏後釋體實亦是行攝。

如是菩薩。充滿其土。生如是處。有如是德。

疏二結德嚴土中。初句總。次生如是處。指前淨土。有如是德。卽指向文。

常作佛事。得佛菩提。清淨光明。具法界智。現神通力。一身充滿一切法界。

疏第二常作佛事下。願業廣中分四。卽四圓滿。初明事業圓滿。上辨佛業。今菩薩業。鈔上辨佛業者。

佛地經但云。作諸衆生一切義利。論先問云。如是淨土任持圓滿。作何事業。卽引向經論云。謂於此中。卽能現作一切有情一切義利。或令一切有情自作一切義利等。今經云一切諸佛於中成道。故是佛業。今明菩薩常作佛事。故是菩薩業。

得大智慧。入一切智所行之境。善能分別無量無邊法界句義。於一切刹。皆無所著。而能普現一切佛土。心如虛空。無有所依。而能分別一切法界。善能入出不可思議。甚深三昧。

疏二得大智下。卽乘圓滿大止妙觀。以爲乘故。鈔大止妙觀者。卽佛地經文。論釋云。止謂奢摩他。觀謂般若。大義如前。大念中緣大乘故。此二等運。故名所乘。乘止與觀。隨其所應。行前道路。趣薩婆若。住諸佛刹。得諸佛力。開演說阿僧祇法。而無所畏。

疏三趣薩婆下。無畏圓滿。內無災患。外無畏故。鈔無畏圓滿。彼經云。遠離衆魔。論云。謂以此中遠離一切煩惱蘊死。及以天魔。或令他人遠離四魔。如是四種。是怖畏因。由是能生諸怖畏故。此中無彼故名無畏。

隨順三世諸佛善根。普照一切如來法界。悉能受持一切佛法。知阿僧祇諸語言法。善能演出不可思議差別音聲。入於無上佛自在地。普遊十方一切世界。而無障礙。行於無諍。無所依法。無所分別。修習增廣菩提之心。得善巧智。善知句義。能隨次第。開演說。

疏四隨順三世下。卽任持圓滿。論云。諸佛菩薩。後得無漏。能說能受。大乘法味。生喜樂故。文中二前。明能受。後知阿僧祇下。能說。鈔卽任持圓滿者。彼經文云。廣大法味。喜樂所持。疏卽論釋也。此文猶略。

具云。謂於此中大乘法味。喜樂所持。食能令住。住是持義。乃至云。此淨土中。諸佛後得無漏之智。能說能持。受大法味。生大喜樂。又正體智。受真如味。生大喜樂。能任持身命。不斷壞故。長養善法。名爲食也。在文可知。

願令如是諸大菩薩莊嚴其國。充滿分布隨順安住。

疏第三結以嚴刹中。初總彰人徧。

熏修極熏修。純淨極純淨。恬然宴寂。

疏次熏修下。結行德深。謂以止以觀。唯智唯悲。熏修身心。無有間斷。名極熏修。現惑不生。故云純淨。種習不起。名極純淨。恬和也。宴安也。恬和安寂。卽照寂之相也。亦一乘也。鈔亦一乘者。以大止妙觀爲熏修故。

於一佛刹。隨一方所。皆有如是無數無量無邊無等。不可數。不可稱。不可思。不可量。不可說。不可說。不可說。諸大菩薩。周徧充滿。如一方所。一切方所。亦復如是。如一佛刹。盡虛空徧法界。一切佛刹。悉亦如是。疏後於一佛刹下。別示徧相。兼顯數多。於中三節。一刹中一方有多數量。次以方例刹。後以刹例法界。一方所言。義兼大小。準下僧祇品。於一微細毛端處。則有不可說諸普賢也。言如是者。如前具德也。

佛子。菩薩摩訶薩。以諸善根。方便迴向一切佛刹。方便迴向一切菩薩。方便迴向一切如來。方便迴向一切佛菩提。方便迴向一切廣大願。方便迴向一切出要道。方便迴向淨一切衆生界。方便迴向於一切世界。常見諸佛出興於世。方便迴向常見如來壽命無量。方便迴向常見諸佛徧周法界。轉無障礙不退法。

輪。

疏第二佛子至方便迴向下。總攝迴向。非唯但向佛淨土故。文有十句。初三結前已說。後七辨所未明。言出要者。小乘出要。唯有四種。謂進念定慧。三十七品。不離此故。今亦兼有大乘出要。唯有三科。謂四攝四等。及與十度。三乘切要。唯止與觀。一乘切要。唯智與悲。故十地皆云大悲爲首。智慧增上。餘並可知。

佛子菩薩摩訶薩。以諸善根。如是迴向時。普入一切佛國土故。一切佛刹皆悉清淨。普至一切衆生界故。一切菩薩皆悉清淨。普願一切諸佛國土佛出興故。一切法界一切佛土諸如來身超然出現。

疏第二佛子至如是迴向下。結行成益。總收三種世間。

佛子菩薩摩訶薩。以如是等無比迴向。趣薩婆若。其心廣大。猶如虛空。無有限量。入不思議。知一切業。及以果報。皆悉寂滅。心常平等。無有邊際。普能徧入一切法界。

疏第二佛子至以如是等下。離相迴向。卽向實際。文中二。先明見實。智冥實際。後彰離妄。德合實際。此之二段。反覆相成。今初初句。牒前迴向菩提。其心已下。正顯離相。寂然無涯。爲入不思議。卽事契真。故常平等。由此故能徧入。若事若理。無礙法界。名爲一切。鈔此之二段。反覆相成者。由見實故。離妄。如見杌則不見鬼。由離妄故。見實。若無鬼見。是見木故。

佛子菩薩摩訶薩。如是迴向時。不分別我。及以我所。不分別佛。及以佛法。不分別刹。及以嚴淨。不分別衆生。及以調伏。不分別業。及業果報。不著於思。及思所起。不壞因。不壞果。不取事。不取法。不謂生死有分別。

不謂涅槃恆寂靜。不謂如來證佛境界。無有少法與法同止。

疏二佛子下。彰其離妄。文有十對。初六遮妄執。有以緣成無性故。皆前迴向之法。思所起者。謂身語業。餘文可知。鈔思所起者。謂身語業者。俱舍云。分別由業生。思及思所作。思即是意業。所作謂身語。故九地廣明。

疏次一對遮妄執空。以卽真故。不礙存故。不壞假名。說實相故。不壞因果。鈔以卽真故下。此有三義。釋不壞因果。初同淨名。色卽是空。非色滅空故。此約空觀。二不礙存故。卽假觀。三不壞假名。說實相故。二義雙照。爲中道觀。

疏後三對雙遮空有。初遮事理。法卽理法。互相卽故。不可定取。

疏次遮生死涅槃離向背相。通有二義。一約離相。謂生死涅槃相待而有。俱空叵得。二約體融。以緣就實。生死卽涅槃。故無妄分別。以實從緣。涅槃卽生死。故非眞寂靜。故中論云。涅槃之實際。及與世閒際。如是二際者。無毫釐差別。而晉經云。生死非雜亂。涅槃非寂靜。言異義同。鈔俱空叵得。卽上云。有諍說生死無諍說涅槃。生死及涅槃。二俱不可得。此約性空。下約顯實。

疏後對卽遮能所證。旣二際無差。唯佛能證。故復拂之上句標。下句釋。亦通二意。一約離相。能證相離。不能證於佛境。所證體空。故無少法與能證智同止相契。故棧伽云。遠離覺所覺。二約體融。佛卽法界。不應以法界更證法界。故文殊問經云。若以法界證法界。則是諍競。如智一體。如外無少智爲能證。智外無少如爲所證。故無可同止。次下文云。無有少法爲智所入。亦無少智而入於法。影公云。法性不並。

眞聖賢無異道。卽斯意也。鈔故楞伽云。遠離覺所覺。前已引竟。故文殊問云下。亦前已引。影公卽中論疏。

疏上來三節。皆約遮邊。前來契實。已辨雙照。則四門備矣。佛子。菩薩摩訶薩。如是迴向時。以諸善根。普施衆生。決定成熟。平等教化。無相無緣。無稱量。無虛妄。遠離一切分別取著。

疏第二佛子下。迴向衆生中。初總明。謂卽前迴向善提時。便以善根迴向衆生。故云如是迴向時也。次決定下。別顯行相。有七句。二句隨相。一無放捨心。二無冤親相。五句離相。一不見衆生相。二不取化緣。三不稱量根性。四無能度我人。末句總結。

菩薩摩訶薩。如是迴向已。得無盡善根。所謂念三世一切諸佛故。得無盡善根。念一切菩薩故。得無盡善根。淨諸佛刹故。得無盡善根。淨一切衆生界故。得無盡善根。深入法界故。得無盡善根。修無量心等。虛空界故。得無盡善根。深解一切佛境界故。得無盡善根。於菩薩業勤修習故。得無盡善根。了達三世故。得無盡善根。

疏第三菩薩至如是迴向已下。結行成德。有四佛子。兼此爲五。一成無盡善根德。二成二空智慧德。三成境界清淨德。四成福智無盡德。五成福智廣大德。就此五中。初一雙明。次二離相。後二隨相。今初由隨一行。發無盡心。故成無盡德。文有十句。初總所謂下別。於中前四隨相所成。初二因果。後二依正。次二離相所成。顯其深廣。次二解行。通於隨相。及與離相。後一通顯上來迴向。同三世故。

佛子。菩薩摩訶薩。以一切善根如是迴向時。了一切衆生界無有衆生。解一切法無有壽命。知一切法無有作者。悟一切法無補伽羅。了一切法無有忿諍。觀一切法皆從緣起。無有住處。知一切物皆無所依。了一切利。悉無所住。觀一切菩薩行。亦無處所。見一切境界。悉無所有。

疏第二佛子下。成二空智慧益中十句。初四我空。一無衆生。離衆生垢故。二無壽命。離生死故。三無作者。亦名無我。離我垢故。四無數取趣。前後際斷故。餘如十行說。後六法空。文亦可知。鈔一無衆生垢故者。多同淨名。卽目連章中淨名云。夫說法者。常如法說。法無衆生。離衆生垢故。法無有我。離我垢故。法無壽命。離生死故。法無有人。前後際斷故。釋曰。上四句我空。故疏取之。此四卽金剛無我無人無衆生無壽者。今經辨次不同。二經皆明無定前後也。名亦小異。以作者當我。以補特伽羅當人。若釋義者。人我等相。十行已具。空之所以。亦如前辨。今取彼經意。按今文釋。一法無衆生者。已無衆生爲法。故遠公云。正明理無。其所無有三。一無橫計神我。二於假名衆生無有定性。三無假名衆生之相。此等皆是虛妄分別。相有理無。餘門類爾。離衆生垢者。破情顯理。取我之心。名衆生垢。生公亦云。若得見理。垢情必盡。以離垢驗之。知無衆生也。二法無壽命。正明理無。離生死故。釋成上義。壽命謂色心連持。從生至死。本無生死。何有壽命。又壽命爲生死之果。若有實者。不合得離。今有本離之人。明本無矣。三無有我者。理本無也。離我垢故。釋成上義。一同初句。四數取趣。淨名爲人。智論云。能造善惡行人法故。取於諸趣。三際輪迴。本無數取者。何有前後際耶。又若定有者。不應聖人斷前後際。今聖有斷。明無有人能數取也。

佛子。菩薩摩訶薩。如是迴向時。眼終不見不淨佛刹。亦復不見異相衆生。無有少法。爲智所入。亦無少智。而入於法。解如來身。非如虛空。一切功德無量妙法。所圓滿故。於一切處。令諸衆生。積集善根。悉充足故。疏第三佛子。成境界清淨德。一刹淨者。略有三義。一了穢卽空故。二如螺髻等穢處見淨故。三雖觀淨穢。無見相故。二衆生淨。同一空故。同如來藏故。無見相故。三法淨。對法辨智。義便故來。此亦二義。一空無能所故。二同一如故。舉一全收。智外無如。爲智所入。如外無智。而入於如。法性寂然。故名爲如。寂而常照。故名爲智。何有異耶。亦同上來。無法同住。後一佛淨。爲破執有。說佛如空。若同空無。此見非淨。今明二利德圓。非如虛空。一向無也。鈔螺髻亦是淨名。前已引竟。餘卽可知。

佛子。此菩薩摩訶薩。於念念中。得不可說不可說十力地。具足一切福德。成就清淨善根。爲一切衆生福田。此菩薩摩訶薩。成就如意摩尼功德藏。隨有所須。一切樂具。悉皆得故。隨所遊方。悉能嚴淨一切國土。隨所行處。令不可說不可說衆生。皆悉清淨。攝取福德。修治諸行故。

疏第四佛子。福智無盡德。初上攝佛智。謂十力智地。有不可說用。故念念得多福。具足下。自爲福田。此菩薩下。福智無盡。

佛子。菩薩摩訶薩。如是迴向時。修一切菩薩行。福德殊勝。色相無比。威力光明。超諸世間。魔及魔民。莫能瞻對。善根具足。大願成就。其心彌廣。等一切智。於一念中。悉能周徧。無量佛刹。智力無量。了達一切諸佛境界。於一切佛。得深信解。住無邊智。菩提心力。廣大如法界。究竟如虛空。

疏第五佛子。福智超勝德中。初句總顯福智之因。次福德下。正顯勝相。初明福勝。其心已下。顯智超勝。

佛子。是名菩薩摩訶薩。第五無盡功德藏迴向。

菩薩摩訶薩。住此迴向。得十種無盡藏。

疏第二菩薩下。辨位果中。四謂標徵釋結。

何等爲十。所謂得見佛無盡藏。於一毛孔見阿僧祇諸佛。出興世故。得入法無盡藏。以佛智力觀一切法。悉入一法故。得憶持無盡藏。受持一切佛所說法。無忘失故。得決定慧無盡藏。善知一切佛所說法。祕密方便故。得解義趣無盡藏。善知諸法理趣分齊故。得無邊悟解無盡藏。以如虛空智。通達三世一切法故。得福德無盡藏。充滿一切諸衆生意。不可盡故。得勇猛智覺無盡藏。悉能除滅一切衆生愚癡翳故。得決定辨才無盡藏。演說一切佛平等法。令諸衆生悉解了故。得十力無畏無盡藏。具足一切菩薩所行。以離垢繪而繫其頂。至無障礙一切智故。

疏三中有十句。皆先標名。後釋義。於中初六自利。初一見佛。約微細門。一毛之義。前文頻釋。今重發揮。謂心性本無大小。悟之成智。身土皆爲智影。智淨影明。故大小無礙。一多卽入。次五見法。卽相入門。一證理法。二持教法。三慧知密意。謂以實覆權等。四義窮意趣。謂四意趣等。亦是窮於性相。五聞藏。義兼修證。次三利他。一福滿他意。二智滅他惑。三辨教平等。後一攝行成果。此上多有同十藏品。可以意得。是爲十佛子。菩薩摩訶薩。以一切善根迴向時。得此十種無盡藏。

疏四結可知。

爾時金剛幢菩薩。普觀十方而說頌言。

菩薩成就深心力。普於諸法得自在。以其勸請隨喜福。無礙方便善迴向。
疏第二應頌二十五偈分二。初一頌所迴善根。文並具舍。

三世所有諸如來。嚴淨佛刹徧世間。所有功德靡不具。迴向淨刹亦如是。
三世所有諸佛法。菩薩皆悉諦思惟。以心攝取無有餘。如是莊嚴諸佛刹。
盡於三世所有劫。讚一佛刹諸功德。三世諸劫猶可盡。佛刹功德無窮盡。
如是一切諸佛刹。菩薩悉見無有餘。總以莊嚴一佛土。一切佛土悉如是。

疏餘三十四偈。雙頌前迴向善根。及結行成益。於中二先有十一偈。頌二段隨相。後十三偈。頌二段離相。今初分三。初八頌向善提。於中亦三。初四頌上嚴刹。

有諸佛子心清淨。悉從如來法化生。一切功德莊嚴心。一切佛刹皆充滿。
彼諸菩薩悉具足。無量相好莊嚴身。辨才演說徧世間。譬如大海無窮盡。
菩薩安住諸三昧。一切所行皆具足。其心清淨無與等。光明普照十方界。如是無餘諸佛刹。此諸菩薩皆充滿。

疏次三偈半。頌人寶莊嚴。

未曾憶念聲聞乘。亦復不求緣覺道。

疏後半偈。頌總攝迴向。

菩薩如是心清淨。善根迴向諸羣生。普欲令其成正道。具足了知諸佛法。

疏二菩薩如是下一偈頌迴向衆生。

十方所有衆魔怨。菩薩威力悉摧破。勇猛智慧無能勝。決定修行究竟法。菩薩以此大願力。所有迴向無留礙。入於無盡功德藏。去來現在常無盡。

疏三十方下二偈頌結行成德五段通頌。

菩薩善觀諸行法。了達其性不自在。既知諸法性如是。不妄取業及果報。無有色法無色法。亦無有想無無想。有法無法皆悉無。了知一切無所得。一切諸法因緣生。體性非有亦非無。而於因緣及所起。畢竟於中無取著。一切衆生語言處。於中畢竟無所得。了知名相皆分別。明解諸法悉無我。如衆生性本寂滅。如是了知一切法。三世所攝無有餘。刹及諸業皆平等。以如是智而迴向。隨其悟解福業生。此諸福相亦如解。豈復於中有可得。如是迴向心無垢。永不稱量諸法性。了達其性皆非性。不住世間亦不出。

疏第二菩薩善觀下頌二段離相中三。初七頌前菩提離相。與前見實及離妄相參而頌。顯此二相成故。

一切所行衆善業。悉以迴向諸羣生。莫不了達其真性。所有分別皆除遣。所有一切虛妄見。悉皆棄捨無有餘。離諸熱惱恆清涼。住於解脫無礙地。

疏次二頌衆生離相。

菩薩不壞一切法。亦不滅壞諸法性。解了諸法。猶如響。悉於一切無所著。了知三世諸衆生。悉從因緣和合起。亦知心樂及習氣。未曾滅壞一切法。

疏後四、頌結行成德離相中。初二頌境界清淨德。
了達業性非是業。而亦不違諸法相。又亦不壞業果報。說諸法性從緣起。
了知衆生無有生。亦無衆生可流轉。無實衆生而可說。但依世俗假宣示。
疏後二頌二空智慧德。第五迴向竟。

大方廣佛華嚴經疏鈔會本卷八十五

佛子。云何爲菩薩摩訶薩隨順堅固一切善根迴向。

疏第六隨順堅固一切善根迴向。長行中亦二。謂位行位果。行中亦三。謂牒釋結。今初牒名徵起。謂所修事善皆悉順入堅固法性。故下文云。則爲隨順真實住。本分名入一切平等善根。入卽隨順平等卽堅固平等之理。不可壞故。若順等理。則順諸善根。故下文云。則爲隨順佛住等。又本業云。習行相善無漏善而不二。故名隨順平等一切善根。此則不唯事順於理。理事相順。受平等名。如此平等。方名堅固。此約所迴善根及所向實際。以立斯名。亦可名爲堅固之善根。堅固卽善根。若以隨順望堅固善根。亦通二義。卽以無礙善根而爲其性。

佛子。此菩薩摩訶薩。或爲帝王臨御大國。

疏第二依徵廣釋中二。先明行所依身。二具足下依身起行。前中復二。先明得位。後顯具德。今初菩薩行檀之身。隨宜萬類。故置或言。而偏語王者。一則在家。是施位故。二難捨能捨。舉勝策劣故。三者菩薩多爲王故。以菩薩位。唯有二種。一者法王。二者人王。法王教化人王攝化。具菩薩戒。處處爲王故。發號施令。無敢違故。具能施物。遂所求故。帝者主也。王者王也。臨者治也。御亦主領。千乘之國。卽稱爲大。下言爲轉輪王。則以一洲已去。可稱爲大。鈔千乘之國者。古以一城。出革車一乘。千乘之國。其地千城也。乘卽車乘。謂以皮裹車革卽皮也。生曰革。熟曰韋。每乘管卒七十二人。一洲已去者。輪王有四鐵

輪卽王一洲故。

威德廣被。名震天下。凡諸怨敵。靡不歸順。發號施令。悉依正法。執持一蓋。溥蔭萬方。周行率土。所向無礙。以離垢繒而繫其頂。於法自在。見者咸服。不刑不罰。感德從化。以四攝法。攝諸衆生。爲轉輪王。一切周給。疏二威德下。顯具德中二。先統領自在德。後菩薩下。正報殊倫德。今初有十二句。初二句總。有威則下必畏之。有德則下必懷之。故令名振。次凡諸下十句別。初句釋威。祖父之讐曰冤。四夷有土曰敵。由威被故。敵歸冤順。次發號下。釋上有德。依正施令。物可則也。執持一蓋等。兼釋臨御。一蓋有三。一則無私萬物故。二等教十善故。下施蓋中云。爲令衆生得自在。蓋能持一切諸善法故。三慈悲蓋。大光王云。如諸菩薩爲高蓋。慈心普蔭諸衆生故。以離垢繒。釋爲帝義。於法自在。釋爲王義。不刑已下。雙顯威德。謂不以刑戮懲罰之威。但令感德從化。則威而不猛也。又加苦曰刑。削奪爲罰。導之以德義。莫敢不服。則庶人無刑。齊之以禮樂。莫敢不敬。則大夫無罰。次以四攝下。顯是菩薩。揀異世王。爲轉輪王。結成有位。一切周給有大財。卽財位果。鈔二等教者。夫輪王十善化世故。

菩薩摩訶薩。安住如是自在功德。有大眷屬。不可沮壞。離衆過失。見者無厭。福德莊嚴。相好圓滿。形體支分。均調具足。獲那羅延堅固之身。大力成就。無能屈伏。得清淨業。離諸業障。

疏二正報殊倫德。初句結前義。兼生後。有大眷屬下。具七種果。一宗族果。二離衆過失。不亢不驕。發言誠實。見者無厭。有慈有慧。人所信順。卽信言果。三福德已下。顯大色果。四獲那羅延堅固之身。顯壽命果。五大力成就等。顯大力果。六得清淨業。謂得大念慧。成就總持。曾事不忘。未萌先覺。由斯有上名振。

天下。卽聲譽果。七離諸業障。顯人性果。有業報障。非丈夫故。兼上財位具八異熟。是增上生。如是自在。是大勢生。鈔具八異熟者。卽瑜伽論三十六淨行品已辨。

具足修行一切布施。或施飲食。及諸上味。或施車乘。或施衣服。或施華鬘。雜香塗香。牀座房舍。及所住處。上妙燈燭。病緣湯藥。寶器寶車。調良象馬。悉皆嚴飾。歡喜布施。或有來乞。王所處座。若蓋若傘。幢旛寶物。諸莊嚴具。頂上寶冠。髻中明珠。乃至王位。皆無所吝。若見衆生在牢獄中。捨諸財寶。妻子眷屬。乃至以身。救彼令脫。若見獄囚。將欲被戮。卽捨其身。以代彼命。或見來乞。連膚頂髮。歡喜施與。亦無所吝。眼耳鼻舌。及以牙齒。頭頂手足。血肉骨髓。心腎肝肺。大腸小腸。厚皮薄皮。手足諸指。連肉爪甲。以歡喜心。盡皆施與。或爲求請。未曾有法。投身而下。深大火坑。或爲護持。如來正法。以身忍受一切苦毒。或爲求法。乃至一字。悉能徧捨。四海之內。一切所有。恆以正法化導羣生。令修善行。捨離諸惡。若見衆生。損敗他形。慈心救之。令捨罪業。若見如來。成最正覺。稱揚讚歎。普使聞知。或施於地。造立僧坊。房舍殿堂。以爲住處。及施僮僕。供承作役。或以自身。施來乞者。或施於佛。爲求法故。歡喜踊躍。爲衆生故。承事供養。或捨王位。城邑聚落。宮殿園林。妻子眷屬。隨所乞求。悉滿其願。或捨一切資生之物。普設無遮大施之會。

疏第二依身起行中三。一明隨相迴向。二明離相迴向。三釋迴向名。初卽迴向善提。及向衆生。次卽迴向實際。後段通二。又初是廣大迴向。次甚深迴向。後兼深廣。今隨相中分三。初總相標列善根迴向。二佛子菩薩摩訶薩。隨所施下。依標廣顯善根迴向。三佛子菩薩摩訶薩。隨諸衆生下。總結多門善根迴向。今初亦三。一列所施物。二其中下辨所施田。三佛子下顯行所依心。今初初句總。或施下別。別中

若望下迴向。應爲六十。若直就文數都八十事。初從飲食至牀座爲一十。以牀座但通是一牀。下文別施座故。次房舍至蓋爲二十。傘至頂髮爲三十。以王位爲重。爲明外財施竟。故結云。乃至王位。下文自有王位。後迴向中。此次後無故。次眼至足爲四十。血至腸爲五十。厚皮至救損他形爲六十。示佛興至。邑爲七十。從聚落至終爲八十。救獄囚中。雖有妻等四事。但爲一救囚之行耳。

疏於中前二十七事。是外財施。次救獄囚。一兼於內外。代囚命下二十九事。唯明內財。下諸門中。或兼內外。或但是外。可以意得。鈔二內外料揀。卽一切施中二門明義。

疏又前二十七。施無樂者。是爲慈行。救囚代命等。爲大悲行。餘或通二行。若通相辨。皆兼二行。鈔三。四等料揀。喜捨二行。在總句中。

疏又代命。救殘害男形。是無畏施。斷殺有二。若望所殺。是無畏施。若望能殺。令持五戒。是爲法施。告示佛興。卽是法施。財施可知。又此等旣並是法門。俱通三施。鈔四。三施料揀。卽一切施也。

其中衆生種種福田。或從遠來。或從近來。或賢或愚。或好或醜。若男若女人。與非人。心行不同。所求各異。等皆施與。悉令滿足。

疏二所施田中等。皆施與者。不揀賢愚等故。悉令滿足者。隨所求故。佛子。菩薩摩訶薩。如是施時。發善攝心。悉以迴向。

疏三顯能施迴向之心者。望前是能施之心。故云如是施時。發善攝心。望後是能迴向心。故云發善攝心。悉以迴向。故下諸門迴向之內。皆以此心貫之。文中二先總明。

所謂善攝色。隨順堅固一切善根。善攝受想行識。隨順堅固一切善根。善攝王位。隨順堅固一切善根。善攝眷屬。隨順堅固一切善根。善攝資具。隨順堅固一切善根。善攝惠施。隨順堅固一切善根。

疏後所謂下別顯於中所攝有五。總收上來能施所施及以施物。言善攝者。釋隨順義。謂此菩薩若行於施迴向之時。於自他五蘊等心無住著。不令馳散。故云善攝。如此則與實際相應。便能隨順堅固善根。謂捨住著故。隨順施善無異求故。隨順戒善忍深理故。隨順忍善離色相故。隨順進善不馳散故。隨順定善了無生故。隨順慧善如是乃至一切由順實際任運順於一切稱性之善。鈔三隨順善根略舉六度總結萬行。

疏第二依標廣顯中。羸相望前。略有五異。一傘二頂。前有後無。舍宅一種。前無後有。卽有無異也。二前以法導化。卽後禁殺令住五戒。卽名字異也。三承事供養。前合後開。象馬等事。前開後合。卽開合異也。四後文舌居牙齒之後。眷屬居妻子之前。骨居腸下。飲於食後。卽前後異。五前略後廣。其文非一也。餘皆大同。然其都門。但有六十。由開合故。謂十二段。二二相合。一象馬。二幢幡。三寶冠明珠。四耳鼻。五牙齒。六手足。七髓肉。八厚薄皮。九手足指。十僮僕。十一園林。十二妻子。復有二段。各五事合。謂一腸腎肝肺四事。及大小腸合一迴向。二王位邑聚落宮殿合一迴向。故下文云。國土一切諸物。卽斯五事。都十四門。合二十事。雖闕二事。而加二事。謂宅舍及開承事。與供侍別故。有六十門。昔光統師以後。都門東前標中。亦唯六十。成一百二十門。皆有十善。成千二百。以七施乘之。成八千四百。一一具十迴向。成八萬四千。言七施者。隨相有六。謂心有三種。卽三時喜。事有三種。卽是三輪。入理有一。卽照三輪空。又以

七聖財乘之亦得。如一施行有八萬四千餘。一行皆亦如是。此上且約法門。非無有理。若散說者。行相無量。如施資具及大會等。不可言一。故次標云。無量無邊。後都結云。阿僧祇物。實則皆是法界大緣起門。普賢無礙自在之行。故以一切所有施於一田。一切皆爾。一微塵處。卽施一切衆生。徧法界皆爾。一刹那中。頓成此行。盡前後際亦爾。此一菩薩滿法界身。備起此行。仍有純雜。若以純門於一施眼。徧上時處。唯見施眼。十方無邊。初後無際。餘門如虛空。雜則隨一施眼。具足諸門。餘亦如是。純雜無礙。重重無盡。故知六十八十。乃舉其大綱耳。鈔然其都門下。正出八十六十。所以開合有無。故二出其本意。以皆成事事無礙重重之行。

佛子。菩薩摩訶薩。隨所施物。無量無邊。以彼善根。如是迴向。

疏文中。二初總標施行。成迴向行。無量之義。已如上辨。

所謂以上妙食施衆生時。其心清淨。於所施物。無貪無著。無所顧恪。具足行施。

疏第二所謂下。一一別顯。六十門內。一一皆四。一施行。二迴向行。三雙結。二行。四迴向所爲。若闕所爲。則但有三。亦可合後二段。爲雙結所爲。此科宜記。下有廣略。至文當知。若具四段。門前多不科判。今第一。施食。以食爲世命。貴賤同依。故首明之。文但有二。先明施行。言其心清淨者。離施過故。謂不求名利。果報及怖畏等而行。施故不貪著者。是無貪思。無顧恪者。是無慳思。又施時無貪著。施已無顧恪。隨所施行。與衆生共兼於事理。名爲具足。此心在初。亦貫下諸段。

願一切衆生。得智慧。食心無障礙。了知食性。無所貪著。但樂法喜。出離之食。智慧充滿。以法堅住。攝取善

根。法身智身清淨遊行。哀愍衆生。爲作福田。現受搏食。

疏二願一切下。迴向行。然其所願。正爲衆生。令得成佛。卽向善提也。下皆準之。然阿含唯識等。說世間食。總有四種。一觸。二思。三識。四段。說出世食。有其五種。一禪悅。二願。三念。四解脫。五法喜。今翻四成五。鈔然阿含唯識等說者。唯識第四云。謂契經說。食有四種。一段食。卽分段義。變壞爲相。謂欲界繫香味觸。三於變壞時。能爲食事。但所觸得。由此色處。非段食攝。以變壞時。色無用故。變壞不益色。麤著眼根故。又此三爲與眼相離。方能有用。不與眼合。故非是食也。問。食爲對自根。亦對餘根。答。先資身根。爲資養已。後資餘根。以發識明利。二觸食。觸境爲相。卽心所觸。爲此食體。謂有漏觸。纒取境時。攝受喜等。能爲食事。此正顯也。此觸雖與諸識相應。七八觸境細故。不攝喜樂等故。屬六識者。食義偏勝。觸麤顯境。攝受喜樂。及順益捨。資養勝故。三思。意食。希望爲相。唯取與欲俱思。謂有漏思。與欲俱轉。希可愛境。能爲食事。此思雖與諸識相應。屬意識者。食義偏勝。意識於境。希望勝故。四識食。執持爲相。謂有漏識。由段觸思。勢力增長。能爲食事。此識雖通諸識自體。而第八識。食義偏勝。一類相續。執持勝故。釋曰。此三食勢。增長此識。亦長養諸根。大種。能爲食事。由是集論說彼四食。三蘊五處。十一界攝。釋曰。段食是色。觸思是行。識食如名。段是香味觸。三處。思是法處。識是意處。段攝三界。觸思法界。識七心界。論云。此四能持有情身命。令不斷壞。故名爲食。餘如彼論。而列段食居其後者。前三有漏。通於三界。段唯欲界故。又順經翻。最在後故。說出世食者。然上云阿含。卽禪阿含。連說九食。前四世間。後五出世。一禪悅食者。禪定資神。輕安適悅。卽爲食義。然其五食。旣云出世。通資法身。二願力任持。出世之法。法身增長。卽

爲食義。三念力明記。聖道現前故。四解脫除障。居然資益。五法喜內充。攝喜樂故。

疏一翻思食成智慧食。卽是念食。念慧鄰故。二無所貪下。翻於觸食以成法喜。觸以攝受喜等能爲食事。故但願法喜。其出離食。卽解脫食。總離四故。三智慧充下。翻於識食以成禪悅。禪則不動故。以法堅住。引生功德故。攝取善根。能除煩惱故。二身清淨。並如識食。能執持故。四哀愍下。大悲願力。現受段食。今云搏者。尙依古譯。鈔一翻前思成第三念。以經之智。釋成於念念慧鄰故。出之所以。亦如四念慧爲體。故鄰近名念。二翻觸成第五。兼於第四。三翻識成第一。四翻段成第二。願食言搏者。尙依古譯。今以飲水等。亦是段食。不可搏握。故譯爲段形。分段而食故。是爲菩薩摩訶薩布施食時。善根迴向。

疏三是爲下。雙結二行。

佛子。菩薩摩訶薩若施飲時。

疏第二施飲中亦三初施行。

以此善根如是迴向。

疏二以此下。迴向行於中。先牒前起後。

所謂願一切衆生飲法味水。精勤修習。具菩薩道。斷世渴愛。常求佛智。離欲境界。得法喜樂。從清淨法。而生其身。常以三昧。調攝其心。入智慧海。興大法雲。霑大法雨。

疏後所謂願一切下。別顯願相。下皆做此。然望食雖異。不離五食。望水雖異。多同水用。故所願事。或翻

或順。或敵體相似。或流類以明。不全尅定。文中一如飲無閒。易得充足。飲法精勤。速具大道。餘並可知。鈔一如飲無閒。此卽敵體相似。斷世渴愛。常求佛智。卽或翻也。得法喜樂等。卽順也。入海雲雨。卽同水義也。下諸門中。體勢亦爾。隨時解釋。

是爲菩薩摩訶薩。布施飲時。善根迴向。

疏三雙結

佛子。菩薩摩訶薩。布施種種清淨上味。所謂辛酸鹹淡。及以甘苦種種諸味。潤澤具足。能令四大安隱調和。肌體盈滿。氣力彊壯。其心清淨。常得歡喜。咽咀之時。不欸不逆。諸根明利。內藏充實。毒不能侵。病不能傷。始終無患。永得安樂。

疏第三施味文四加所爲故。初施行可知。

以此善根如是迴向。所謂願一切衆生。得最上味。甘露充滿。願一切衆生。得法智味。了知一切諸味業用。願一切衆生。得無量法味。了達法界。安住實際。大法城中。願一切衆生。作大法雲。周徧法界。普雨法雨。教化調伏一切衆生。願一切衆生。得勝智味。無上法喜。充滿身心。願一切衆生。得無貪著。一切上味。不染世間一切諸味。常勤修習一切佛法。願一切衆生。得一法味。了諸佛法。悉無差別。願一切衆生。得最勝味。乘一切智。終無退轉。願一切衆生。得入諸佛無異法味。悉能分別一切諸根。願一切衆生。法味增益。常得滿足。無礙佛法。

疏二以此下。迴向行中十願。初願。曾經得上味相。則是三十二相之一。經說佛大牙後有甘露泉。但食

入口悉爲甘露。約法亦卽涅槃。爲甘露不死之味。餘文並顯。鈔經說佛大牙等者。卽涅槃十四。其施食等。亦皆發願。各是一事。與此大同。不能繁引。

是爲菩薩摩訶薩。布施味時。善根迴向。

疏三雙結

爲令一切衆生。勤修福德。皆悉具足。無礙智身故。

疏四所爲

佛子。菩薩摩訶薩。施車乘時。以諸善根。如是迴向。所謂願一切衆生。皆得具足一切智乘。乘於大乘。不可壞乘。最勝乘。最上乘。速疾乘。大力乘。福德具足乘。出世間乘。出生無量諸菩薩乘。是爲菩薩摩訶薩。施車乘時。善根迴向。

疏第四施車乘分三。初施行者。義通馬等。以第十六別施車故。迴向十願。皆約代步。初一唯果。餘兼通。因然乘體性。通於理智。隨義立名。一體性包含二。不可廢立。三超劣。四無過。五不歷。三祇。六十力。普運。七兼五度。萬行。八無漏。相應。九發心。趣者。卽名菩薩。鈔義通馬者。以梵語通呼車乘云野。余我反囊。若別呼車云奢羯吒。若呼車輅云曷羅他。此云野囊。明是車乘故。通馬等下。第十六卽單是車。以梵云奢羯吒故。

佛子。菩薩摩訶薩。布施衣時。以諸善根。如是迴向。所謂願一切衆生。得慚愧衣。以覆其身。捨離邪道。露形惡法。顏色潤澤。皮膚細軟。成就諸佛第一之樂。得最清淨一切種智。是爲菩薩摩訶薩。布施衣時。善根迴向。

向。

疏第五衣中。瑜伽施衣。能感妙色。以衣禦寒。令顏色潤澤故。又新衣成。慳持獻佛。得無量福。若要期日。數未滿而取。成取佛物。

佛子。菩薩摩訶薩。常以種種名華布施。所謂微妙香華。種種色華。無量奇妙華。善見華。可喜樂華。一切時華。天華人華。世所珍愛華。甚芬馥悅意華。以如是等無量妙華。供養一切現在諸佛。及佛滅後所有塔廟。或以供養說法之人。或以供養比丘僧寶。一切菩薩諸善知識。聲聞獨覺。父母宗親。下至自身。及餘一切貧窮孤露。布施之時。

疏第六施華文四。初施行中。先列施物。後供養下。明所施田。下至自身者。身為福田。是法器故。依之進道。故施自身。勝施外道無量。

以諸善根如是迴向。所謂願一切衆生。皆得諸佛三昧之華。悉能開敷一切諸法。願一切衆生。皆得如佛。見者歡喜。心無厭足。願一切衆生。所見順愜。心無動亂。願一切衆生。具行廣大清淨之業。願一切衆生。常念善友。心無變異。願一切衆生。如阿伽陀藥。能除一切煩惱衆毒。願一切衆生。成滿大願。皆悉得爲無上智王。願一切衆生。智慧日光。破愚癡暗。願一切衆生。菩提淨月。增長滿足。願一切衆生。入大寶洲。見善知識。具足成就一切善根。

疏迴向十願。前七可知。八赤蓮華等。不遇日光。翳死無疑。菩薩之行。必資乎智。涅槃第九云。譬如蓮華。爲日所照。無不開敷。九月開青蓮。佛智照行。涅槃二十云。譬如月光。能令一切優鉢羅華。開敷鮮明。十

約寶華。鈔涅槃第九下。卽如來性品。廣歎涅槃之德。疏但舉喻。彼合文云。一切衆生亦復如是。若得見聞大涅槃。自未發心者。皆悉發心。爲菩提因。是故我說大涅槃光。所入毛孔。必爲妙因。彼一闍提。雖有佛性。而爲無量罪垢所纏。不能得出。如蠶處繭。以其合文。第一疏已用。今但要喻耳。九月開青蓮者。卽梵行品。耆婆爲闍王說。因世尊入月愛三昧。放光照王。王問其故。耆婆答云。此是如來入月愛三昧。放光問云。何等名爲月愛三昧。耆婆答言。譬如月光。能令一切優鉢羅花。開敷鮮榮。月愛三昧。亦復如是。能令衆生善心開敷。下卽廣說。今但取月開青蓮耳。合以佛智爲月。行爲蓮開。是爲菩薩摩訶薩布施華時善根迴向。爲令衆生皆得清淨無礙智故。

疏後二段可知

佛子。菩薩摩訶薩布施鬘時。以諸善根如是迴向。所謂願一切衆生。人所樂見。見者欽歎。見者親善。見者愛樂。見者渴仰。見者除憂。見者生喜。見者離惡。見者常得親近於佛。見者清淨。獲一切智。是爲菩薩摩訶薩布施鬘時善根迴向。

疏第七施鬘者。貫華如環。而爲首飾。或以纓身。故未見則樂見。正見則愛樂。鈔或以纓身者。在身曰纓。在首曰鬘。纓乃鬘類。皆結華成。因便故來。

佛子。菩薩摩訶薩布施香時。以諸善根如是迴向。

疏第八施香中。準下塗香。十度萬行皆香。此偏語戒者。翻破戒之穢故。

願一切衆生具足戒香。得不缺戒。不褻戒。不污戒。無悔戒。離纏戒。無熱戒。無犯戒。無邊戒。出世戒。菩薩波

羅蜜戒。願一切衆生以是戒故。皆得成就諸佛戒身。

疏願有十二。初一總標。次十別顯。少同十藏。多同智論。隨宜不同。但按文釋。一具持三聚。二不雜外道。三無染心。涅槃經中。乃至染環釧聲。亦名汗菩薩戒。四不犯重故。犯重之人。多生悔恨。五設有誤犯。深慚愧故。如其故犯。數犯。不生慚愧。深愛著犯。見犯是福。名之爲纏。六七定共相應。故無惑熱。常持如初。八九道共相應。離斷常邊。成出世行。十遠離二乘。圓修十度。方名不犯菩薩律儀。是智所讚戒。末句結因成果。謂五分之一。

是爲菩薩摩訶薩。布施香時。善根迴向。爲令衆生悉得圓滿無礙戒蘊故。

佛子。菩薩摩訶薩。施塗香時。以諸善根如是迴向。所謂願一切衆生。施香普熏。悉能惠捨一切所有。願一切衆生。戒香普熏。得於如來究竟淨戒。願一切衆生。忍香普熏。離於一切險害之心。願一切衆生。精進香普熏。常服大乘精進甲冑。願一切衆生。定香普熏。安住諸佛現前三昧。願一切衆生。慧香普熏。一念得成。無上智王。願一切衆生。法香普熏。於無上法。得無所畏。願一切衆生。德香普熏。成就一切大功德。智願一切衆生。菩提香普熏。得佛十力。到於彼岸。願一切衆生。清淨白法妙香普熏。永滅一切不善之法。是爲菩薩摩訶薩。施塗香時。善根迴向。

疏第九塗香十度。皆有熏發資長菩提心義。辟除蔽障。俱得稱香。

佛子。菩薩摩訶薩。施牀座時。以諸善根如是迴向。

疏第十施牀座中。初舉施行。下第十八。別明施座。故晉譯此以爲牀敷。深允當也。

所謂願一切衆生得諸天牀座。證大智慧。願一切衆生得賢聖牀座。捨凡夫意。住菩提心。願一切衆生得安樂牀座。永離一切生死苦惱。願一切衆生得究竟牀座。得見諸佛自在神通。願一切衆生得平等牀座。恆普熏修一切善法。願一切衆生得最勝牀座。具清淨業。世無與等。願一切衆生得安隱牀座。證真實法。具足究竟。願一切衆生得清淨牀座。修習如來淨智境界。願一切衆生得安住牀座。得善知識。常隨覆護。願一切衆生得師子牀座。常如如來右脅而臥。

疏迴向。行中十願。一卽第一義天。大智證故。二菩提心。是賢聖依。三涅槃解脫。四首楞嚴定。名爲究竟。如四禪座。能發神通。除六可知。

是爲菩薩摩訶薩。施牀座時。善根迴向。爲令衆生修習正念善護諸根故。佛子。菩薩摩訶薩。施房舍時。以諸善根。如是迴向。所謂願一切衆生。皆得安住清淨佛刹。精勤修習一切功德。安住甚深三昧境界。捨離一切住處執著。了諸住處皆無所有。離諸世間。住一切智。攝取一切諸佛所住。住究竟道安樂住處。恆住第一清淨善根。終不捨離佛無上住處。是爲菩薩摩訶薩。施房舍時。善根迴向。爲欲利益一切衆生。隨其所應。思惟救護故。

疏十一房舍中。攝取一切諸佛所住。謂聖天梵等。後言不捨佛最上住者。住大寂室。餘取事類例。可以虛求。

佛子。菩薩摩訶薩。施住處時。以諸善根。如是迴向。所謂願一切衆生。常獲善利。其心安樂。願一切衆生。依如來住。依大智住。依善知識住。依尊勝住。依善行住。依大慈住。依大悲住。依六波羅蜜住。依大菩提心住。

依一切菩薩道住。是爲菩薩摩訶薩。住處時。善根迴向。爲令一切福德清淨故。究竟清淨故。智清淨故。道清淨故。法清淨故。戒清淨故。志樂清淨故。信解清淨故。願清淨故。一切神通功德清淨故。

疏十二住處。謂僧坊等。

佛子。菩薩摩訶薩。施諸燈明。所謂酥燈。油燈。寶燈。摩尼燈。漆燈。火燈。沉水燈。栴檀燈。一切香燈。無量色光燈。施如是等無量燈時。爲欲利益一切衆生。爲欲攝受一切衆生。

疏十三施燈。一明施行於中列其施物。寶燈者。如夜光之類。沉水栴檀。用和酥油。無量色者。然膏色白。然漆色赤。然油色黃。然檀色綠。如是種種。如是等下明其施意。

以此善根如是迴向。所謂願一切衆生得無量光。普照一切諸佛正法。願一切衆生得清淨光。照見世間極微細色。願一切衆生得離翳光。了衆生界空無所有。願一切衆生得無邊光。身出妙光。普照一切。願一切衆生得普照光。於諸佛法心無退轉。願一切衆生得佛淨光。一切剎中悉皆顯現。願一切衆生得無礙光。一光徧照一切法界。願一切衆生得無斷光。照諸佛利光明不斷。願一切衆生得智幢光。普照世間。願一切衆生得無量色光。照一切刹示現神力。

疏二以此下迴向。行於中先正顯迴向願。後辨迴向意。前中十願。然準瑜伽賢首。皆明施燈得淨眼報。然燈功德。經燒燈供養。大能滅罪。生福。令發願言。當以大海爲油。須彌爲炷。然大燈明。徧佛刹海。供養無休。又願法門之燈。大願爲炷等。今文願中。具身智光。並可思準。鈔然準瑜伽等者。瑜伽文廣。事亦可知。賢首偈云。又放光名眼清淨。能令盲者見衆色。以燈施佛及佛塔。是故得成此光明。然燈功德經。

者亦名施燈功德。唯有一卷。前廣說施燈所獲功德。近後偈云。於彼佛塔施燈已。其人身光如燈照。牟尼牛王清淨眼。以好燈明照彼塔。得於無漏無上道。其身光明照十方。見四真諦具十力。不共之法亦究竟。得徧見眼成善逝。此果皆由布施燈。釋曰。此明至極功德。次有偈校量云。設令一切諸衆生。昔曾供養無量佛。具大威德見實義。億劫來成緣覺道。十方所有諸世界。悉布燈明無有餘。以是世界諸燈鬘。若人信心供養彼。是人如是修供養。於無量劫常不斷。若人一燈供養佛。得福過前無有量。燈油譬如大海水。其炷猶如須彌山。有人能然如是燈。徧照一切諸世界。是人深心唯敬信。其志唯求緣覺道。十方徧置如是燈。一心恭敬而供養。若人發於菩提心。手執草炬暫供佛。是人得福過於彼。我見實義。作是說。釋曰。按上經文。以佛德難思。故舉廣供辟支。不及佛塔。非令發願。今取下七十八大願爲炷。大悲爲油等例之。應廣發願。令其事理皆廣大耳。

菩薩如是施燈明時。爲欲利益一切衆生。安樂一切衆生。故以此善根隨逐衆生。以此善根攝受衆生。以此善根分布衆生。以此善根慈愍衆生。以此善根覆育衆生。以此善根救護衆生。以此善根充滿衆生。以此善根緣念衆生。以此善根等益衆生。以此善根觀察衆生。

疏後菩薩如是下顯迴向意。

是爲菩薩摩訶薩。施燈明時善根迴向。

疏三是爲下雙結。

如是迴向。既有章疏。普令衆生。生善根中。

疏四如是下。迴向所爲。其迴向意。諸文應具。大同所爲。故略不明。
佛子。菩薩摩訶薩。施湯藥時。以諸善根如是迴向。

疏十四湯藥中三。一施行。施藥近果。得無病報。如薄俱羅。遠得藥王樹身等。如十大願中辨。
所謂願一切衆生。於諸蓋纏。究竟得出。願一切衆生永離病身。得如來身。願一切衆生作大良藥。滅除一切不善之病。願一切衆生成阿伽陀藥。安住菩薩不退轉地。願一切衆生成如來藥。能拔一切煩惱毒箭。願一切衆生親近賢聖。滅諸煩惱。修清淨行。願一切衆生作大藥王。永除衆病。不令重發。願一切衆生作不壞藥樹。悉能救療一切衆生。願一切衆生得一切智光。出衆病箭。願一切衆生善解世間方藥之法。所有疾病爲其救療。

疏二迴向行。言不重發者。經云。世醫所療治。雖差還復生。來來所治者。畢竟不復發。餘可知。鈔世醫所療治。雖差還復生。卽涅槃經。第五地中當廣引說。

菩薩摩訶薩。施湯藥時。爲令一切衆生永離衆病故。究竟安隱故。究竟清淨故。如佛無病故。拔除一切病箭故。得無盡堅固身故。得金剛圍山所不壞身故。得堅固滿足力故。得圓滿不可奪佛樂故。得一切佛自在堅固身故。以諸善根如是迴向。

疏三菩薩下。雙辨二行所爲。言金剛圍山所不能壞者。如不思議法品。十種大那羅延幢勇健法中第一。說堅固滿足力。亦是彼品中十力第七。名堅固力。不可奪樂者。是常樂故。自在堅固身者。卽金剛身。金剛爲內照之實。非唯金色。故云自在。鈔卽金剛身者。涅槃第三有金剛身品。金剛爲內照之實。卽

生公釋言非唯金色亦不全遮意通內外耳前已引竟。

佛子菩薩摩訶薩悉能惠施一切器物所謂黃金器盛滿雜寶白銀器盛衆妙寶琉璃器盛種種寶玻璃器盛滿無量寶莊嚴具磲磔器盛赤眞珠瑪瑙器盛滿珊瑚摩尼珠寶白玉器盛衆美食旃檀器盛天衣服金剛器盛衆妙香無量無數種種寶器盛無量無數種種衆寶。

疏十五施器中文四初施行中三一所施物。

或施諸佛信佛福田不思議故。或施菩薩知善知識難值遇故。或施聖僧爲令佛法久住世故。或施聲聞及辟支佛於諸聖人生淨信故。或施父母爲尊重故。或施師長爲恆誘誨令依聖教修功德故。或施下劣貧窮孤露大慈大悲愛眼等視諸衆生故。專意滿足去來今世一切菩薩檀波羅蜜故。以一切物普施一切終不厭捨諸衆生故。

疏二或施下對田顯施聖僧通三乘。

如是施時於其施物及以受者皆無所著。

疏三如是下成波羅蜜。

菩薩摩訶薩以如是等種種寶器盛無量寶而布施時以諸善根如是迴向所謂願一切衆生成等虛空無邊藏器念力廣大悉能受持世出世間一切經書無有忘失願一切衆生成清淨器能悟諸佛甚深正法願一切衆生成無上寶器悉能受持三世佛法願一切衆生成就如來廣大法器以不壞信攝受三世佛菩提法願一切衆生成就最勝寶莊嚴器住大威德菩提之心願一切衆生成就功德所依處器於諸

如來無量智慧。生淨信解。願一切衆生成就。趣入一切智器。究竟如來無礙解脫。願一切衆生得盡未來劫。菩薩行器。能令衆生普皆安住。一切智力。願一切衆生成就。三世諸佛種性勝功德器。一切諸佛妙音所說。悉能受持。願一切衆生成就。容納盡法界虛空界一切世界一切如來衆會道場器。爲大丈夫讚說之首。勸請諸佛轉正法輪。

疏二菩薩下。明迴向行十願。一廣。二深。三高。四堅。五勝。六淨。七果。八悲。九聞熏納教。十攝法上首。然隨施一器。卽發多願。未必一器以對一願。

是爲菩薩摩訶薩。布施器時。善根迴向。爲欲普令一切衆生皆得圓滿普賢菩薩行願器故。
疏三結四所爲可知。

大方廣佛華嚴經疏鈔會本卷八十六

十迴向品第二十五

佛子菩薩摩訶薩以種種車衆寶嚴飾。

疏十六施車中二先標列財田後佛子菩薩摩訶薩以如是等下隨田別顯前中三一總標所施奉施諸佛及諸菩薩師長善友聲聞緣覺如是無量種種福田及至貧窮孤露之者此諸人衆或從遠來或從近來或承菩薩名聞故來或是菩薩因緣故來或聞菩薩往昔所發施願故來或是菩薩心願請來疏二奉施下別舉福田於中先辨類後此諸人下彰其來意因緣故來者往昔有緣應受施故菩薩是時或施寶車或施金車悉妙莊嚴鈴網覆上寶帶垂下或施上妙瑠璃之車無量珍奇以爲嚴飾或復施與白銀之車覆以金網駕以駿馬或復施與無量雜寶所莊嚴車覆以寶網駕以香象或復施與旃檀之車妙寶爲輪雜寶爲蓋寶師子座敷置嚴好百千綵女列坐其上十萬丈夫牽御而行或復施與玻瓈寶車衆雜妙寶以爲嚴飾端正女人充滿其中寶帳覆上幘旛侍側或復施與碼碯藏車飾以衆寶熏諸雜香種種妙華散布莊嚴百千綵女持寶瓔珞駕馭均調涉險能安或復施與堅固香車衆寶爲輪莊嚴巨麗寶帳覆上寶網垂下種種寶衣敷布其中清淨好香流芬外徹其香美妙稱悅人心無量諸天翼從而行載以衆寶隨時給施或復施與光明寶車種種諸寶妙色映徹衆妙寶網羅覆其上雜寶瓔珞周匝垂下散以末香內外芬潔所愛男女悉載其上

疏三菩薩是時下別列所施以明施行問瑜伽三十九云若有衆生來求種種能引戲樂能引無義所施之物不應施與今施美色豈不相違又云施妻子時不應施與冤家惡人藥叉羅刹凶暴業者今云種種福田豈皆施與答能施有二謂必知能爲損惱不施無咎若不委知但作利安之心施亦無咎况菩薩能知無染又同行之女必不生物染又女能以法而化彼故故攝論中有利有染無利無染有染無利此三菩薩不行有利無染菩薩乃行鈔問瑜伽等者卽彼明菩薩應施不應施中總有二十三類今當其一不應施與下更有論云何以故若施彼時雖暫令彼於菩薩所心生歡喜而復令彼廣作種種不饒益事謂因施故令彼多行憍逸惡行身壞之後墮諸惡趣從今施美色下疏以論難經又云施妻子時不應施與怨家亦是此論次文其凶暴業者論具云又諸菩薩於自妻子奴婢僕使親戚眷屬若不先以正言曉喻令其歡喜終不強逼令其憂惱施來乞者雖復先以曉喻令其歡喜生樂欲心而不施與怨家惡友藥叉羅刹凶暴業者不以妻子形容軟弱族姓男女施來求者令作奴婢論次又云菩薩若有上品逼惱衆生樂行種種暴惡業者來求王位終不施與若彼暴惡補特伽羅先居王位菩薩有力尙應廢黜况當施與釋曰此皆不應施又從今云種種下疏以論難經答能施有二下答中先正答後引證前有三意一菩薩善知不知皆得二知女無染三知翻利益故攝論中者卽無性論第八兩本世親皆是第九梁論當第十二今依無性然是義引彼論先併舉本論四句後更牒釋今便舉便釋本論云若諸菩薩成就如是增上尸羅增上質多增上般若功德圓滿於諸財位得大自在何故現見有諸有情匱乏財位釋曰上卽問也釋論今解本論答云見彼有情於諸財位有重業障故無性

先總明答意云。今當顯說。由是因緣。菩薩雖有財位自在。而不施他。釋向初答云。謂諸菩薩。見彼有情。於其財位。有重業障。故不施與。勿令惠施。空無有果。設復施彼。亦不能受。何用施爲。如有頌云。如母乳嬰兒。一經月無倦。嬰兒喉若閉。乳母欲何爲。解曰。此卽第一無利無染。以一向不能受。何利何染。二本論云。見彼有情。若施財位。障生善法。故釋論云。謂諸菩薩。見彼有情。雖於財位。無重業障。而彼若得財位圓滿。便多放逸。不起善法。作是思惟。寧復現世少時貧賤。勿令來生多時貧賤。故不施彼所有財位。解曰。卽第二有染無利。三本論云。見彼有情。若乏財位。厭離現前。故釋論云。謂諸菩薩。見彼有情。若乏財位。厭生死心。便現在前。求欲出離。若得富貴。卽生放逸。故不施彼所有財位。作是思惟。寧彼貧賤。厭離生死心。常現前。勿復富貴。愛樂放逸。不起善法。解曰。此亦成上有染無利。四本論云。見彼有情。若施財位。卽爲積集不善法。因故釋論云。謂諸菩薩。見彼有情。若當施彼。滿足財位。卽便放逸。積集種種惡不善業。故不施彼所有財利。如有頌云。寧使貧乏於財位。遠離惡趣諸惡行。勿被富貴亂諸根。令感當來衆苦器。解曰。亦有染無利。五本論云。見彼有情。若施財位。卽便作餘無量有情損惱。因故釋論云。謂諸菩薩。見彼有情。若得富貴。卽便損惱無量有情。故不施彼所有財位。作如是念。寧彼一身受貧窮苦。勿令損惱餘多有情。解曰。亦有染無利也。故本論結云。是故現見有諸有情。匱乏財位。此中存頌。見業障現前。積集損惱。故現見諸有情。不感菩薩施。釋曰。上云五重。但有二句。初一無利無染。餘四皆有染無利。而義不同。一障生善法。二不生厭離。三自積不善。四損惱於他。其有利有染。損益雙具。故亦不施爲損過微。論略不說。餘可知也。

佛子。菩薩摩訶薩。以如是等衆妙寶車。奉施佛時。

疏第二隨田別顯約五類田。則分爲五。一一段中文皆具四。今初施佛。先施行可知。

以此善根如是迴向。所謂願一切衆生悉解供養最上福田。深信施佛得無量報。願一切衆生一心向佛。常遇無量清淨福田。願一切衆生於諸如來無所吝惜。具足成就大捨之心。願一切衆生於諸佛所修行。離二乘願。速得如來無礙解脫。一切智智。願一切衆生於諸佛所行無盡施。入佛無量功德智慧。願一切衆生入佛勝智。成清淨無上智王。願一切衆生得佛徧至無礙神通。隨所欲往。靡不自在。願一切衆生深入大乘。獲無量智。安住不動。願一切衆生皆能出生一切智法。爲諸天人最上福田。願一切衆生於諸佛所無嫌恨心。勤種善根。樂求佛智。願一切衆生任運能往一切佛刹。一刹那中普周法界。而無懈倦。願一切衆生速得菩薩自在神通。分身徧滿等虛空界。一切佛所親近供養。願一切衆生得無比身。徧往十方而無厭倦。願一切衆生得廣大身。飛行迅疾。隨意所往。終無懈退。願一切衆生得佛究竟自在威力。一刹那中盡虛空界。悉現諸佛神通變化。願一切衆生修安樂行。隨順一切諸菩薩道。願一切衆生得速疾行。究竟十力智慧神通。願一切衆生普入法界。十方國土悉盡邊際。等無差別。願一切衆生行普賢行。無有退轉。到於彼岸。成一切智。願一切衆生升於無比智慧之乘。隨順法性。見如實理。

疏迴向行中有二十願。初十約所施佛田立願。後十約所施車立願。並顯可知。

疏但云修安樂行者。法華安樂行品說四安樂行。一畢竟空行。經名行處近處。已入於理而履行之名。爲行處。故經云。又復於法無所行。而觀諸法如實相等。雖未入理。能遠諸惡親而近之名。親近處。故經

云。不親近國王及外道等。爲遠惡也。觀一切法空。爲近理也。二名身口無過失行。三者心無嫉妬行。四大慈悲行。廣如彼說。鈔法華等者。今疏所列。初一會諸師義。後三全同生公。生公初一但名行處。近處。意是總明遠惡近理。下三別耳。寶林基公。第一名空行。二名離慍慢。三四同生公。南嶽云。一名無著正慧。二明口不說過。三敬上接下。四同生公。大乘法師。一正身行。二正語行。三心離諸惡。自利行。四心修善法。利他行。天台云。止觀慈悲。導三業及誓願。初身有止。故離身業。業有觀。故不得身業。不得能離。無所得。故不墮。凡夫有慈悲。故勤修身業。廣利一切。不墮二乘。有止行。故著忍辱衣。有觀行。故坐如來座。有慈悲。故入如來室。止行。離過。卽成斷德。觀行。無著。卽成智德。慈悲利他。卽成恩德。恩德資成智德。智德能通達斷德。名身安樂行。餘口意誓願。亦如是。釋曰。此卽通辨三法爲能導。其所導卽初一是身。二是口。三是意。四是誓願。大乘法師。傍以立名。然諸師立。皆從多分增勝。以分通用三法。理則玄妙。不彰。四別。今取生公之意。合身口在第二。取行處近處。及南嶽寶林共立一名。名畢竟空行。寶林但語一空。似約於境。南嶽云。無著慧。但語於心。今云畢竟空。心境兩亡。空有雙會。故生公云。近處明遠惡。近理行處。而爲履行之。宗在畢竟空耳。此爲大智。四爲大悲。悲智相導。於中二三業。天台之意。亦不失也。又初後成德。中二離過。離過卽斷德。初智後悲。三德備矣。雖義俱通。從多故別。是以第一經中。但名行處。近處。意在近理行理耳。已入於下。卽生公釋。下疏引經證。旣云無行而觀。卽寂照雙流。爲行理也。而言等者。等取下文。亦不行不分別。釋此自有二意。一謂上無行而觀。皆是不分別。今又不行。則寂照兩亡也。二但對上。而觀諸法如實相。恐濫從行起觀。今明正觀時。亦不行此觀。不分別此觀。就行約。心詣於

理觀約照達於理。今心行不行。觀無分別。卽觀無觀。是寂照雙流。故下偈云。又復不行上中下法。有爲無爲。實不實法。卽不行也。亦不分別是男是女。不得諸法。不知不見。正是入理。卽亦不分別也。問。若以入理爲行。住忍辱地等。豈入理行耶。答。正是入理。謂無生地寂滅之忍。爲所住處。柔和善順。卽柔順忍。而不卒暴。心亦不驚。卽音聲忍。三忍頓具。故爲入理。住忍辱地。卽如來衣。觀如實相。卽如來座。以此導悲。卽如來室。雖未入理下。亦生公之意。遠諸惡下。引經證先證遠諸惡言。及外道等等取餘八。總離十緣。一遠豪勢。謂國王等。爲損害緣。二不近邪人法。謂外道梵志等。爲惡見緣。三亦不親近諸有凶戲者。是壞亂緣。四又不親近梅陀羅等。卽惡業緣。五不親近求聲聞等。卽離劣友緣。六又文殊師利等。不應於女人身取能生欲想相。而爲說法等。卽長染緣。七亦復不近五種不男之人。卽非器緣。八不獨入他家。卽譏訶緣。九若爲女人說法下。離非軌緣。天台云。八離冤害。九離譏嫌。十不樂畜年少弟子沙彌小兒等。卽散亂緣。上明不應親近下。云常好坐禪下。明所應親近上。爲親近之始。爲初親近處。次云復次菩薩摩訶薩。觀一切法空如實相等。卽第二親近處。爲親近之終。正明近理以觀想未除。故名親近。二身口無過失者。經云。若口宣說。若讀經時。不樂說人及經典。過長行多唯辨口。偈中則說於身。以油漆身。澡浴塵穢。亦兼身矣。三心無嫉妒者。經云。於後末世。法欲滅時。受持讀誦斯經典者。無懷嫉妒。詭詐之心等。四云。於在家出家人中生大慈心。於非菩薩人中生大悲心等。廣如彼經。

疏然安樂者。略有二意。一涅槃之果。名爲安樂。此行能趣。卽安樂之行。二住此四行。則身靜神定。身靜神定。則外苦不干。故稱安樂。又常見外道。因果俱苦。斷見外道。因樂果苦。析法二乘。因苦果樂。唯有苦

薩。因果俱樂。故涅槃云。定苦行者。謂諸凡夫。苦樂行者。謂聲聞緣覺。定樂行者。謂諸佛菩薩。因果俱樂。名安樂行。鈔然安樂下。釋安樂行名。初釋以果名。因二。因卽安樂。亦生公意。又常見等。卽天台意。常見外道因果俱苦者。計我常故。修於苦行。以期妙果。所修是邪。還招苦果。斷見外道。不信當報。恣意行。惡受五欲樂。當受苦果。析法二乘。無常拙度。加功苦到。此名因苦。得入涅槃。故云果樂。菩薩如實巧度。故爲因樂。證大菩提。常涅槃樂。故涅槃下。引證卽二十七經。經云。善男子。不見中道者。凡有三種。一定樂行。二定苦行。三苦樂行。一定樂行者。所謂菩薩憐愍。愍一切諸衆生故。雖復處在阿鼻地獄。如三禪樂。二定苦行者。所謂凡夫。三苦樂行者。所謂聲聞緣覺。聲聞緣覺行於苦樂。作中道想。以是義故。雖有佛性而不能見。下經文廣。不正釋凡夫。而說道有三種。謂下中上。下者梵天。無常謬見。是常等。後說生死本際。凡有二種。一者無明。二者有愛。是二中間。卽有生老病死等者。是定苦行也。

是爲菩薩摩訶薩。以衆寶車奉施。現在一切諸佛。及佛滅後所有塔廟。善根迴向。爲令衆生得於如來究竟出離無礙乘故。

疏三結文中。加及佛滅後所有塔廟。塔安舍利。廟置佛像。塔者。正云窣堵波。此云高顯。亦曰歸宗之所。言所有者。不局佛塔故。長阿含說四種人。應可起塔。一佛。二辟支佛。三阿羅漢。四輪王。十二因緣經云。八種人應起塔。一佛。其露盤八層已上。餘七。謂菩薩緣覺四果輪王。次第減一層。輪王唯一層。見一層塔。不應禮拜。非聖人故。僧祇律說。凡僧亦許起塔。然不得安露盤。令在屏處。謂一持律。二法師。三營事。四德望。今造塔者。宜審此文。汎論起塔。總有六意。一爲表人勝。二爲令生淨信。三令標心有在。四令供

養生福。五爲報恩行畢。六生福滅罪。若造佛塔。近招梵福。遠脫生死。故無上依經。供佛舍利。如芥子許。悉得究竟脫生死苦。鈔長阿含十二因緣經。僧祇律。造塔事未檢。故無上依經者。經有兩卷。今當第一。因阿難隨佛乞食。見一新成樓閣。心念有人以此勝閣。布施四方僧。并具四事。若如來滅後。取佛舍利。如芥子大。安立塔中。起塔如阿摩羅子大。戴刹如針大。露盤如棗葉大。造佛如麥子大。此二功德。何者爲勝。問佛。佛讚廣爲引喻較量。初舉滿閻浮提。如稻麻竹葦。四果及辟支佛。有人盡形四事供養。滅後起大塔供養。佛問功德多不。阿難答多。次舉西瞿陀尼。次舉東弗婆提。次舉北鬱單越。皆量漸廣。供事如前。比所造閣。如帝釋所處。問於阿難。阿難皆答甚多。佛告阿難。若有善男子善女人。佛涅槃後。取舍利如芥子大。造塔如阿摩羅子大。戴刹如針大。露盤如棗葉大。造佛如麥子大。此功德比前所說百分不及一。千分不及一。億分不及一。乃至算數譬喻所不能及。阿難。若此功德。不迴向阿耨多羅三藐三菩提。此功德聚。所獲福報。盡娑婆世界微塵數。作他化自在天王。化樂天王。兜率天王。夜摩天王。三十三天王。況復轉輪聖王。釋曰。據此但云福多。若加迴向。必至究竟。

佛子。菩薩摩訶薩。以衆寶車施菩薩等。善知識時。以諸善根。如是迴向。所謂願一切衆生。心常憶持善知識。教專勤守護。令不忘失。願一切衆生。與善知識同一義利。普攝一切。與共善根。願一切衆生。近善知識。尊重供養。悉捨所有。順可其心。願一切衆生。得善志欲。隨逐善友。未嘗捨離。願一切衆生。常得值遇諸善知識。專意承奉。不違其教。願一切衆生。樂善知識。常不捨離。無間無雜。亦無誤失。願一切衆生。能以其身。施善知識。隨其教命。靡有違逆。願一切衆生。爲善知識之所攝受。修習大慈。遠離諸惡。願一切衆生。隨善

知識聽聞諸佛所說正法。願一切衆生與善知識同一善根。清淨業果。與諸菩薩同一行願。究竟十力。願一切衆生悉能受持善知識法。逮得一切三昧境界。智慧神通。願一切衆生悉能受持一切正法。修習諸行。到於彼岸。願一切衆生乘於大乘。無所障礙。究竟成就一切智道。願一切衆生悉得上於一切智乘。至安隱處。無有退轉。願一切衆生知如實行。隨其所聞一切佛法。皆得究竟。永無忘失。願一切衆生普爲諸佛之所攝受。得無礙智。究竟諸法。願一切衆生得無退失。自在神通。所欲往詣。一念皆到。願一切衆生往來自在。廣行化導。令住大乘。願一切衆生所行不空。載以智乘。到究竟位。願一切衆生得無礙乘。以無礙智至一切處。

疏二施菩薩中有二十願。前十約所施田。發相似願。後十約所施車。發相似願。並顯可知。是爲菩薩摩訶薩。施善知識種種車時。善根迴向。爲令衆生功德具足。與佛菩薩等無異故。佛子。菩薩摩訶薩。以衆寶車。布施僧時。起學一切施心。智善了心。淨功德心。隨順捨心。僧寶難遇心。深信僧寶心。攝持正教心。住勝志樂。得未曾有。爲大施會。出生無量廣大功德。深信佛教。不可沮壞。疏三施僧。初施行中。顯十施心。一財無不捨。田無所揀。二了事可否。受畜不淨。不應施故。三淨三輪故。四順檀行故。五因佛有僧。僧難遇故。六依僧知佛故。七依僧知教故。八應景慕。九不局一僧。十由教說僧故。

以諸善根如是迴向。所謂願一切衆生普入佛法。憶持不忘。願一切衆生離凡愚法。入賢聖處。願一切衆生速入聖位。能以佛法次第開誘。願一切衆生舉世宗重。言必信用。願一切衆生善入一切諸法平等了。

知法界自性無二。願一切衆生從於如來智境而生。諸調順人所共圍繞。願一切衆生住離染法。滅除一切煩惱塵垢。願一切衆生皆得成就無上僧寶。離凡夫地。入賢聖衆。願一切衆生勤修善法。得無礙智。具聖功德。願一切衆生得智慧心。不著三世。於諸衆中自在如王。願一切衆生乘智慧乘。轉正法輪。願一切衆生具足神通。一念能往不可說不可說世界。願一切衆生乘虛空身。於諸世間智慧無礙。願一切衆生普入一切虛空法界。諸佛衆會成就第一波羅蜜行。願一切衆生得輕舉身。殊勝智慧。悉能徧入一切佛刹。願一切衆生獲無邊際善巧神足。於一切刹普現其身。願一切衆生得於一切無所依身。以神通力如影普現。願一切衆生得不思議自在神力。隨應可化。卽現其前。教化調伏。願一切衆生得入法界無礙方便。一念徧遊十方國土。

疏二迴向行中。有二十願。亦前十約田。後十約車。其十三云。乘虛空身者。當其無有車之用故。鈔當其無有車之用者。卽老子道經云。三十輻共一轂。當其無有車之用。注云。此明無有功用。相資而成。又下結云。有之以爲利。無之以爲用。意明假轅箱輪等。以成於車。車中不虛。則無所用故。約形質麤有之利。以明妙無之用。今借此語。萬行緣成之乘。其內無性。卽中空矣。若不涉有。無以利物。若不入空。無以導行。以有空義。一切法得成。故爲大用也。

是爲菩薩摩訶薩。施僧寶車。善根迴向。爲令衆生普乘清淨無上智乘。於一切世間轉無礙法智慧輪故。佛子。菩薩摩訶薩。以衆寶車。布施聲聞獨覺之時。起如是心。所謂福田。尊敬心。功德海心。能出生功德智慧心。從如來功德勢力所生心。百千億那由他劫修習心。能於不可說劫修菩薩行心。解脫一切魔繫。

縛心摧滅一切魔軍衆心。慧光照了無上法心。

疏四施二乘中亦四。初施行中言如來勢力生者。設是獨覺。亦由過去曾習佛法。後道成無佛世故。六
七翻彼三生百劫故。鈔翻三生百劫者。羅漢三生修福緣覺百劫。今令百千億那由他劫修等故。

以此施車所有善根。如是迴向。所謂願一切衆生。爲世所信第一福田。具足無上檀波羅蜜。願一切衆生
離無益語。常樂獨處。心無二念。願一切衆生成最第一清淨福田。攝諸衆生。令修福業。願一切衆生成智
慧淵。能與衆生無量無數善根果報。願一切衆生住無礙行。滿足清淨第一福田。願一切衆生住無諍法。
了一切法皆無所作。無性爲性。願一切衆生常得親近最上福田。具足修成無量福德。願一切衆生能現
無量自在神通。以淨福田。攝諸含識。願一切衆生具足無盡功德福田。能與衆生如來十力第一乘果。願
一切衆生。爲能辦果真實福田。成一切智。無盡福聚。願一切衆生得滅罪法。悉能受持所未曾聞佛法句
義。願一切衆生常勤聽受一切佛法。聞悉解悟。無空過者。願一切衆生聽聞佛法。通達究竟。如其所聞。隨
順演說。願一切衆生於如來教信解修行。捨離一切九十六種外道邪見。願一切衆生常見賢聖。增長一
切最勝善根。願一切衆生心常信樂。智行之士。與諸聖哲。同止共歡。願一切衆生聽聞佛名。悉不唐捐。隨
其所聞。咸得目見。願一切衆生善分別知。諸佛正教。悉能守護。持佛法者。願一切衆生常樂聽聞一切佛
法。受持讀誦。開示照了。願一切衆生信解佛教。如實功德。悉捨所有恭敬供養。

疏二以此下迴向行中亦二十願。多翻劣顯勝。前十多翻緣覺樂獨善寂等故。無諍有二。一人嫌我行。
我則長立等。二觀緣無性無乖違故。

疏後十翻聲聞。一翻彼小乘。非究竟滅罪之法。彼犯律儀。容可懺滅。犯四重禁。爲不可救。大乘至教無所不滅。佛名經說。一聞佛名。滅無量劫生死重罪。涅槃第十云。若犯四禁。及五逆罪。若爲邪鬼毒惡所持。聞是經典。所有諸惡。悉皆消滅。又云。犯四重禁。不還生者。無有是處。如是等文。處處皆有。犯重得佛。聞大經力故。二聲聞雖從佛聞。未悟深理故。三不能廣傳故。四望於大乘。猶是邪故。所以諸處多說九十五種。別有九十五種外道邪論經。今言九十六者。自有二義。一依薩婆多律。說外道六師。各有十六種所學法。一法自學。餘十五種。各教十五弟子。師徒合論。有九十六。二者外道有二。一外外道。卽佛法外。二內外道。此復三種。一附佛法外道。起自犢子方廣。自以聰明讀佛經書。而生一見。附佛法起。故得此名。犢子讀舍利弗毘曇。自別制義。言我在四句外。第五不可說藏中。佛說此人不異外道。諸論皆推不受。名外道也。又方廣道人。自以聰明讀佛十喻。自作義云。不生不滅。如幻如化。空幻爲宗。龍樹斥言。此非佛法。方廣所作。亦邪人法也。二學佛法成外道。謂執佛教門。而生煩惱。不得入理。故智論云。若不得般若意。入阿毘曇。卽墜有中等。三以大斥小。故七卷楞伽第一云。大慧云。何爲外道惡見。謂不知境界。自心分別。現於第一義。見有見無。而起言說。又第二云。復有說言。見一切法。因作者有此是涅槃。大慧彼無解脫。以未能見法無我故。此是聲聞。及外道種性。於未出中生。出離想。應勤修習。捨此惡見。故諸大乘。訶彼二乘。同於外道。非奪方便之意。今合後三。總爲一類。成九十六。依此義故。發願永離。七中得目見者。非聞見故。餘可例知。鈔涅槃等者。明經法資人。除惑有十復次。今是其一。經云。若比丘比丘尼。優婆塞。優婆夷。及諸外道。有能受持。如是經典。讀誦通利。復爲他人分別演說。若自書寫。令他書。

寫斯等皆是菩提因緣。若犯四禁及五逆罪。若爲邪鬼毒惡所持。聞是經典。所有諸惡悉得除滅。如見良醫。惡鬼遠去。當知是人。是真菩薩摩訶薩也。何以故。暫得聞是大涅槃故。亦以生念如來常故。若暫聞者。尚得如是。何況書寫受持讀誦。釋曰。是則疏但舉中。又云犯四重者。卽第五經云。又解脫者。名爲虛寂。無有不定。有不定者。如一闍提。究竟不移。犯重禁者。不成佛道。無有是處。何以故。是人若於佛法中心得淨信。爾時卽便滅一闍提。若復得作優婆塞者。亦得斷滅於一闍提。犯重禁者。滅此罪已。則得成佛。若言畢竟不成佛道。無有是處。如是等文者。第六又云。是大涅槃微妙經典。不可消伏。甚奇甚特。若有聞者。聞已信受。能信如來是常住法。如是之人。甚爲希有。如優曇華。我涅槃後。若有得聞。如是大乘微妙經典。生敬信心。當知是等於未來世。百千億劫。不墮惡道。第九經初。又云。譬如日出。衆霧悉除。此大涅槃微妙經典。亦復如是。出興於世。若有衆生。一經於耳。悉能滅除一切諸惡。無閒罪業。其餘大乘文亦廣多。二學佛法。成外道。若不得般若意。入阿毘曇。則滯有故。故七卷楞伽者。七卷卽實。又難陀三藏所譯。然十卷文廣。四卷文慳。七卷處中。而文又潤。疏所引經。具足經文。引意明此。呼二乘以爲外道。何以得知。是二乘耶。以此前有經云。大慧。此是過去未來現在一切如來應正等覺。覺法自性第一義心。以此心成就。如來世出世間最上之法。以聖慧眼。入自共相。種種安立。其所安立。不與外道惡見共故。次卽是疏所引之文。謂前是佛法。言不與外道共。早兼二乘。況出相。不知境界自心分別等。卽二乘見。又四卷云。大慧。云何外道論惡見共。所謂自境界妄想見。不覺識自心。所現分齊大通。大慧。愚癡凡夫。性無性。自性第一義。作二見論。釋曰。此則皆二乘見。故同外道。又第二云者。亦彼七卷經。外道

二乘同義更顯。疏所引經一字無闕。以斯二段。明呵二乘。同外道也。出相下疑有脫文。是爲菩薩摩訶薩。施聲聞獨覺種種車時。善根迴向。爲令衆生皆得成就清淨第一智慧神通精進修行。無有懈怠。獲一切智力無畏故。

佛子。菩薩摩訶薩。以衆寶車施諸福田。乃至貧窮孤獨者時。隨其所求。一切悉捨。心生歡喜。無有厭倦。仍向彼人。自悔責言。我應往就。供養供給。不應勞汝。遠來疲頓。言已拜跪。問訊起居。凡有所須。一切施與。或時施彼摩尼寶車。以閻浮提第一女寶。充滿其上。或復施與金莊嚴車。人聞女寶。充滿其上。或復施與妙瑠璃車。內宮妓女。充滿其上。或施種種奇妙寶車。童女充滿。如天姝女。或施無數寶莊嚴車。寶女滿中。柔明辯慧。或施所乘妙旃檀車。或復施與玻瓈寶車。悉載寶女。充滿其上。顏容端正。色相無比。袿服莊嚴。見者欣悅。或復施與碼碯寶車。灌頂王子。身載其上。或時施與堅固香車。所有男女。悉載其中。或施一切寶莊嚴車。載以難捨親善眷屬。佛子。菩薩摩訶薩。以如是等無量寶車。隨其所求。恭敬施與。皆令遂願。歡喜滿足。

疏五施諸田。初施行中。有悲境故。加以拜跪等言。以有劣田。重舉妙物。最下乞人。等如來故。言袿服者。大盛玄黃之服也。

大方廣佛華嚴經疏鈔會本卷八十七

以此善根如是迴向。所謂願一切衆生。乘不退轉無障礙廣大之乘。詣不可思議菩提樹下。願一切衆生。乘清淨因大法智乘。盡未來劫。修菩薩行。永不退轉。願一切衆生。乘一切法無所有乘。永離一切分別執著。而常修習一切智道。願一切衆生。乘無諂誑正直之乘。往諸佛刹。自在無礙。願一切衆生。隨順安住一切智乘。以諸佛法。共相娛樂。願一切衆生。皆乘菩薩清淨行乘。具足菩薩十出離道。及三昧樂。願一切衆生。乘四輪乘。所謂住好國土。依止善人。集勝福德。發大誓願。以此成滿一切菩薩清淨梵行。願一切衆生。得普照十方法光明乘。修學一切如來智力。願一切衆生。乘佛法乘。到一切法。究竟彼岸。願一切衆生。載衆福善難思法乘。普示十方安隱正道。願一切衆生。乘大施乘。捨慳恪垢。願一切衆生。乘淨戒乘。持等法界無邊淨戒。願一切衆生。乘忍辱乘。常於衆生。離瞋濁心。願一切衆生。乘大精進不退轉乘。堅修勝行。趣菩提道。願一切衆生。乘禪定乘。速至道場。證菩提智。願一切衆生。乘於智慧巧方便乘。化身充滿一切法界諸佛境界。願一切衆生。乘法王乘。成就無畏。恆普惠施。一切智法。願一切衆生。乘無所著智慧之乘。悉能徧入一切十方。於真法性而無所動。願一切衆生。乘於一切諸佛法乘。示現受生。徧十方刹。而不失壞大乘之道。願一切衆生。乘一切智最上寶乘。滿足普賢菩薩行願。而無厭倦。

疏二以此下迴向行。亦二十願。施田非一故。但就車發相似願。其中亦兼所施女等。可以意得。
疏六云十出離道者。卽是十地。以十度行。出十重障。離十羸故。

疏七乘四輪乘者。文中自列。然莊嚴論第六名四種不放逸輪。先辨相者。各具五種因緣。一住好國土輪者。彼名勝土輪。言五緣者。一者易求。謂四事易故。二善護。王如法故。三善地。處調和故。四善伴。同戒見故。五善寂。無喧聲故。鈔莊嚴論第六名四種不放逸輪者。一勝土輪。二善人輪。三自正輪。四先福輪。下疏依此論以釋其相。經住好國土者。論有偈云。易求及善護。善地亦善伴。善寂此勝土。菩薩即往生。今疏即長行釋。但小略耳。具云。一者易求。謂四事供身不難得故。二善護國。王如諸惡人盜賊不能住故。三善地。處所調和。無疾厲故。四善伴。同見同戒。爲伴侶故。五善寂。謂盡日無喧雜聲故。

疏二依止善人輪。五緣者。一多聞。二見諦。三巧說。四憐憫。不貪利故。五不退。無疲倦故。鈔經依止善人。偈云。多聞及見諦。巧說亦憐愍。不退此丈夫。菩薩勝依止。下釋即論前三易故。不釋論具云。一多聞。成就阿舍故。二見諦。得聖果故。三巧說。分別法故。四憐憫。不貪利故。五不退。無疲倦故。

疏三集勝福德輪者。彼當第四名先福輪。一可樂。由住勝世爲因故。二無難。由值善人爲因故。三無病。四三昧。五智慧。此三以自正輪爲因。鈔經三集勝福德偈云。可樂及無難。無病與寂靜。觀察此五種。宿植善根故。釋云。一可樂。二無難。三無病。四三昧。五智慧。第一事由住勝土爲因。第二事由值善人爲因。後三事由自正成就爲因。釋曰。疏中將後出因。便開名釋之。

疏四發大誓願。彼當第三名自正輪。故成實論。名自發正願輪。一善緣。妙法爲緣故。二善聚。具福智故。三善修。止觀諸行相應修故。四善說。無求利故。五善出。所有上法恭順修故。鈔經四發大誓願。下彼當第三偈云。善緣及善聚。善修及善說。善出此五種。是名自正勝。彼釋云。一者善緣。妙法爲緣故。下四

多同。一兩字異。二者善聚。福智具足故。三者善修。止觀諸行相應時修故。四者全同。五順字是敬字耳。上云成實論名自發正願者。論第二四法品云。又經中說人天四輪能增善法。一住善處。二依善人。三自發正願。四宿植善根。次卽明摧八難。次下當知。

疏然前二就果立稱。後二從因立名。雖俱通因果影略互顯。前二外緣。後二內因。願是智因。福是福因。疏此四何因受輪之稱。依成實論。以四輪能摧八難故。謂初住善處能除五難。卽三塗北洲及長壽天。次依善人。除佛前後難。三發大誓願。除世智辨聰。四宿植善根。除生盲聾瘂。前五惡處。六是惡時。七是惡因。八是惡果。已知四輪云何總名爲乘。瑜伽論說住好國土。謂得人天身。出諸難處。以爲車體。二由集勝福。諸根完具。如車轂軸釘鑿。可施脂膏。三發大願。如良牛引重致遠。四依善人。謂佛菩薩。如善御者。由具此四。成大涅槃。故云成滿一切清淨梵行。因圓必至果也。若依此經。國土卽十國土。海善人卽十身如來。勝福卽性起功德。大願卽普賢願海。共成無盡大法界緣起車也。餘並可知。鈔三得名。二先明得輪名。卽成實論文。

是爲菩薩摩訶薩。以衆寶車施諸福田。乃至貧窮孤露之人。善根迴向。爲令衆生具無量智。歡喜踊躍。究竟皆得一切智乘故。

佛子。菩薩摩訶薩。布施象寶。其性調順。七支具足。年齒盛壯。六牙清淨。口色紅赤。猶如蓮華。形體鮮白。譬如雪山金幢。爲飾寶網。羅覆種種妙寶。莊嚴其鼻。見者欣玩。無有厭足。超步萬里。曾不疲倦。或復施與調良馬寶。諸相具足。猶如天馬。妙寶月輪。以爲光飾。真金鈴網。羅覆其上。行步平正。乘者安隱。隨意所往。迅

疾如風。遊歷四洲。自在無礙。菩薩以此象寶馬寶。或奉養父母及善知識。或給施貧乏苦惱衆生。其心曠然。不生悔吝。但倍增欣慶。益加悲愍。修菩薩德。淨菩薩心。

以此善根如是迴向。所謂願一切衆生住調順乘。增長一切菩薩功德。願一切衆生得善巧乘。能隨出生一切佛法。願一切衆生得信解乘。普照如來無礙智力。願一切衆生得發趣乘。能普發興一切大願。願一切衆生具足平等波羅蜜乘。成滿一切平等善根。願一切衆生成就寶乘。生諸佛法。無上智寶。願一切衆生成就菩薩行莊嚴乘。開敷菩薩諸三昧華。願一切衆生得無邊速疾乘。於無數劫淨菩薩心。精勤思惟了達諸法。願一切衆生成就最勝調順大乘。以善方便。具菩薩地。願一切衆生乘最高廣堅固大乘。普能運載一切衆生。皆得至於一切智位。

疏十七施象馬二事。合有十願。一如性調順。二如隨意所住。三似彼盛壯。四如超步萬里。五猶行步平正。六如彼象寶。七似彼如華。八即迅疾如風。九上云調順。通顯增於功德。今云具菩薩地名最勝調象馬。各有調義。故分二願。十似彼上立金幢。

是爲菩薩摩訶薩。施象馬時。善根迴向。爲令衆生皆得乘於無礙智乘。圓滿究竟。至佛乘故。佛子。菩薩摩訶薩。布施座時。或施所處師子之座。其座高廣。殊特妙好。瑠璃爲足。金縷所成。柔軟衣服。以敷其上。建以寶幢。熏諸妙香。無量雜寶莊嚴之具。以爲莊校。金網覆上。寶鐸風搖。出妙音聲。奇珍萬計。周帀填飾。一切臣民。所共瞻仰。灌頂大王。獨居其上。宣布法化。萬邦遵奉。其王復以妙寶嚴身。所謂普光明寶。帝青寶。大帝青寶。勝藏摩尼寶。明淨如日。清涼猶月。周帀繁布。譬如衆星。上妙莊嚴。第一無比。海殊妙。

寶。海堅固幢寶。奇文異表。種種莊嚴。於大衆中最尊最勝。閻浮檀金離垢寶。以冠其首。享灌頂位。王閻浮提。具足無量大威德力。以慈爲主。伏諸怨敵。教令所行。靡不承順。時轉輪王。以如是等百千萬億無量無數寶莊嚴座。施於如來第一福田。及諸菩薩。真善知識。聖賢僧寶。說法之師。父母宗親。聲聞獨覺。及以發趣菩薩乘者。或如來塔。乃至一切貧窮孤露。隨其所須。悉皆施與。

以此善根如是迴向。所謂願一切衆生坐菩提座。悉能覺悟諸佛正法。願一切衆生處自在座。得法自在。諸金剛山所不能壞。能悉摧伏一切魔軍。願一切衆生得佛自在師子之座。一切衆生之所瞻仰。願一切衆生得不可說不可說種種殊妙寶莊嚴座。於法自在。化導衆生。願一切衆生得三種世間最殊勝座。廣大善根之所嚴飾。願一切衆生得周徧不可說不可說世界座。阿僧祇劫歎之無盡。願一切衆生得大深密福德之座。其身充滿一切法界。願一切衆生得不思議種種寶座。隨其本願所念衆生。廣開法施。願一切衆生得善妙座。現不可說諸佛神通。願一切衆生得一切寶座。一切香座。一切華座。一切衣座。一切鬘座。一切摩尼座。一切瑠璃等。不思議種種寶座。無量不可說世界座。一切世間莊嚴清淨座。一切金剛座。示現如來威德自在。成最正覺。

疏十八施座迴向中。言三種世間。義如常釋。辨法師云。地前爲願樂世間。初地至七地。名功用世間。八至等覺。名無功用世間。有云西域相傳衆生界中有三世間。一地下世間。龍修羅等。二人中世間。三天上世間。若依智論三世間者。卽衆生五蘊及器爲三。於彼顯勝。義皆無失。餘並可知。是爲菩薩摩訶薩。施寶座時善根迴向。爲令衆生獲離世間大菩提座。自然覺悟一切佛法故。

佛子。菩薩摩訶薩。施諸寶蓋。此蓋殊特尊貴。所用種種大寶而爲莊嚴。百千億那由他上妙蓋中。最爲第一。衆寶爲竿。妙網覆上。寶繩金鈴。周匝垂下。摩尼瓔珞次第懸布。微風吹動。妙音克諧。珠玉寶藏。種種充滿。無量奇珍。悉以嚴飾。栴檀沈水。妙香普熏。閻浮檀金。光明清淨。如是無量百千億那由他阿僧祇衆妙寶物。具足莊嚴。以清淨心。奉施於佛。及佛滅後。所有塔廟。或爲法故。施諸菩薩。及善知識。名聞法師。或施父母。或施僧寶。或復奉施一切佛法。或施種種衆生福田。或施師僧。及諸尊宿。或施初發菩提之心。乃至一切貧窮孤露。隨有求者。悉皆施與。

疏十九。施蓋中。本行經說。編草爲蓋。七寶蓋隨。況衆寶嚴功報何極。鈔本行經者。賢愚經第八。說過去有王名爲金剛。夫人有胎。身上恆有七寶大蓋。及生太子。身紫金色。相好具足。蓋在其上。名蓋事王。七寶自至。王四天下。卽是佛身。佛言阿難。因過去久遠仙人山。有辟支佛涅槃後。有長者起塔。以蓋蓋其上。故獲斯報。

以此善根。如是迴向。所謂願一切衆生勤修善根。以覆其身。常爲諸佛之所庇廕。願一切衆生功德智慧。以爲其蓋。永離世間一切煩惱。願一切衆生覆以善法。除滅世間塵垢熱惱。願一切衆生得智慧藏。令衆樂見。心無厭足。願一切衆生以寂靜白法。而自覆蔭。皆得究竟不壞佛法。願一切衆生善覆其身。究竟如來清淨法身。願一切衆生作周徧蓋。十方智慧徧覆世間。願一切衆生得妙智慧。出過三世。無所染著。願一切衆生得應供蓋。成勝福田。受一切供。願一切衆生得最上蓋。獲無上智。自然覺悟。是爲菩薩摩訶薩布施蓋時善根迴向。

爲令一切衆生得自在蓋。能持一切諸善法故。爲令一切衆生能以一蓋。普覆一切虛空法界。一切刹土。示現諸佛自在神通。無退轉故。爲令一切衆生能以一蓋莊嚴十方一切世界。供養佛故。爲令一切衆生以妙幢旛。及諸寶蓋。供養一切諸如來故。爲令一切衆生得普莊嚴蓋。徧覆一切諸佛國土。盡無餘故。爲令一切衆生得廣大蓋。普蓋衆生。皆令於佛生信解故。爲令一切衆生以不可說衆妙寶蓋。供養一佛。於不可說一一佛所。皆是故。爲令一切衆生得佛菩提高廣之蓋。普覆一切諸如來故。爲令一切衆生得一切摩尼寶莊嚴蓋。一切寶瓔珞莊嚴蓋。一切堅固香莊嚴蓋。種種寶清淨莊嚴蓋。無量寶清淨莊嚴蓋。廣大寶清淨莊嚴蓋。寶網彌覆。寶鈴垂下。隨風搖動。出微妙音。普覆法界虛空界一切世界諸佛身故。爲令一切衆生得無障無礙。智莊嚴蓋。普覆一切諸如來故。又欲令一切衆生得第一智慧故。又欲令一切衆生得佛功德莊嚴故。又欲令一切衆生於佛功德。生清淨欲願心故。又欲令一切衆生得無量無邊自在心寶故。又欲令一切衆生滿足諸法自在智故。又欲令一切衆生以諸善根。普覆一切故。又欲令一切衆生成就最勝智慧蓋故。又欲令一切衆生成就十力。普徧蓋故。又欲令一切衆生能以一蓋。彌覆法界諸佛刹故。又欲令一切衆生於法自在。爲法王故。又欲令一切衆生得大威德自在心故。又欲令一切衆生得廣大智。恆無絕故。又欲令一切衆生得無量功德。普覆一切皆究竟故。又欲令一切衆生以諸功德。蓋其心故。又欲令一切衆生以平等心。覆衆生故。又欲令一切衆生得大智慧平等蓋故。又欲令一切衆生具大迴向巧方便故。又欲令一切衆生獲勝欲樂清淨心故。又欲令一切衆生得善欲樂清淨意故。又欲令一切衆生得大迴向。普覆一切諸衆生故。

疏四所爲中有十爲令。二十又欲。皆令衆生因圓果滿。觸理皆蓋。方顯菩薩悲智深妙。可謂隨順一切善根。並可虛求。法門浩大。不可具釋。

佛子。菩薩摩訶薩。或施種種上妙幢旛。衆寶爲竿。寶繒爲旛。種種雜綵。以爲其幢。寶網垂覆。光色徧滿。寶鐸微搖。音節相和。奇特妙寶。形如半月。閻浮檀金。光踰皦日。悉置幢上。隨諸世界。業果所現。種種妙物。以爲嚴飾。如是無數千萬億那由他諸妙幢旛。接影連輝。遞相間發。光明嚴潔。周徧大地。充滿十方。虛空法界。一切佛刹。菩薩摩訶薩。淨心信解。以如是等無量幢幡。或施現在一切諸佛。及佛滅後所有塔廟。或施法寶。或施僧寶。或施菩薩諸善知識。或施聲聞及辟支佛。或施大衆。或施別人。諸來求者。普皆施與。以此善根。如是迴向。所謂願一切衆生皆能建立一切善根。福德幢旛。不可毀壞。願一切衆生建一切法。自在幢旛。尊重愛樂。勤加守護。願一切衆生常以寶繒書寫正法。護持諸佛菩薩法藏。願一切衆生建高顯幢。然智慧燈。普照世間。願一切衆生立堅固幢。悉能摧殄一切魔業。願一切衆生建智力幢。一切諸魔所不能壞。願一切衆生得大智慧。那羅延幢。摧滅一切世間慢幢。願一切衆生得智慧日大光明幢。以智日光普照法界。願一切衆生具足無量寶莊嚴幢。充滿十方一切世界。供養諸佛。願一切衆生得如來幢。摧滅一切九十六種外道邪見。

疏二十幢旛二事。合一迴向十中初二幢旛合願。一建善翻惡。二重法翻慢。次一唯就旛旛書字故。後七皆就幢旛。

是爲菩薩摩訶薩施幢旛時善根迴向。爲令一切衆生得甚深高廣菩薩行幢。及諸菩薩神通行幢。清淨

道故。

佛子。菩薩摩訶薩。開衆寶藏。以百千億那由他諸妙珍寶。給施無數一切衆生。隨意與之。心無吝惜。以諸善根如是迴向。所謂願一切衆生常見佛寶。捨離愚癡。修行正念。願一切衆生皆得具足法寶。光明護持一切諸佛法藏。願一切衆生能悉攝受一切僧寶。周給供養。恆無厭足。願一切衆生得一切智。無上心寶。淨菩提心。無有退轉。願一切衆生得智慧寶。普入諸法。心無疑惑。願一切衆生具足菩薩諸功德寶。開示演說無量智慧。願一切衆生得於無量妙功德寶。修成正覺。十力智慧。願一切衆生得妙三昧。十六智寶。究竟成滿廣大智慧。願一切衆生成就第一福田之寶。悟入如來無上智慧。願一切衆生得成第一無上寶王。以無盡辯開演諸法。

疏二十一開藏施寶迴向行中。言十六智寶者。辨法師云。地前明得明增。印順無間等四定。地上光明集福德王。賢首健行等四定。此八各有自分勝進。依此發智。爲十六智寶。有云佛地四智。智各有四。故爲十六。以果位自在互融通故。鈔地上光明集福德王賢首等。如出現品。四智之義。亦具上文。智各有四。如出現品。

疏今依賢首。卽是八忍八智。然此有二。一依觀能所取。以立十六。一苦法智忍。觀三界苦真如。正斷三界見苦。所斷分別隨眠。二苦法智。謂忍無間觀前真如。證前所斷煩惱解脫。三苦類智忍。謂智無無漏慧生於法忍智。各別內證。言後聖法。皆是此類。四苦類智。謂此無間無漏智生。審定印可。苦類智忍。前二觀如。後二觀智。苦下有四三諦亦然。爲十六智。鈔今依賢首者。且依唯識釋之。卽論釋相見。

道中緣安立諦。有十六心見道。一苦法智忍者。苦卽苦諦。法者卽彼能詮之教。智者所謂加行道中緣苦法智忍者。無漏忍。忍前苦法智也。此苦法智忍。觀苦下。如能斷三界見道二十八種分別隨眠。謂欲苦有十。上二界苦各九。以除瞋故。三界合有二十八也。二苦法智者。法謂苦如能緣苦如之智。名苦法智。三苦類智忍者。謂苦法智無閒。無漏慧生等。意云此第三心。於一剎那。各別內證。法忍法智。謂二心後。乃至無學一切聖法。從此二心。彼得生故。故云皆是此類。四苦類智者。此智但緣第三苦類智忍。故雜集云。於苦類智忍內證印可。故名苦類智。前二者。謂法忍法智。觀如類忍類智觀智。

疏二者依觀上下諦境別立。謂觀欲苦有法忍法智。初卽無閒道。後卽解脫道。次觀上二界苦爲類忍類智。類同欲故。如苦旣然。餘三亦爾。爲十六智。廣如唯識雜集第九所明。鈔二者依觀者。論云二者依觀上下諦境別立法類十六種心。謂觀現前不現前界苦等四諦。各有二心。一現觀忍。二現觀智。釋曰。欲界名下。是現前界。色無色名上。是不現前界。十六心者。謂觀欲界四諦別立法忍法智八種。依觀上二界四諦別立類忍類智八種。然論但舉欲界苦諦以爲法也。一現觀忍。是無閒道。二現觀智。是解脫道。餘可準知。如其所應。法眞見道無閒解脫。見分觀諦。斷見所斷百一十二分別隨眠。名相見道。釋曰。今疏已略配而不法自證者。彼疏云。以於前十六心後。而作此觀。觀漸羸故。今謂觀智卽法自證。旣不觀智。故不法耳。一百一十二者。欲界四諦四十。上二界四諦。各除瞋故。八諦減八。故百一十二。餘可知。如苦旣然。下類釋餘三。一諦有四。故有十六。皆斷二十八分別隨眠。然是取意。具足論云。如於苦諦。有四種心。集滅道諦。應知亦爾。此十六心。八觀眞如。八觀正智。可知。法眞見道無閒解脫。見自證分。差

別建立名相見道。釋曰。謂法忍法真無間道見分。法智法真解脫道見分。類忍法無間之自證分。類智法解脫之自證分。印前智故。差別立也。

疏第十願言無上寶王者。佛爲法寶之主故。

是爲菩薩摩訶薩。施衆寶時。善根迴向。爲令一切衆生皆得成滿第一智寶。如來無礙淨眼寶故。佛子。菩薩摩訶薩。或以種種妙莊嚴具。而爲布施。所謂一切身莊嚴具。令身淨妙。靡不稱可。菩薩摩訶薩。等觀一切世間衆生。猶如一子。欲令皆得身淨莊嚴。成就世間最上安樂。佛智慧樂。安住佛法利益衆生。以如是等百千億那由他種種殊妙寶莊嚴具。勤行布施。

行布施時。以諸善根如是迴向。所謂願一切衆生成就無上妙莊嚴具。以諸清淨功德智慧莊嚴人天。願一切衆生得清淨莊嚴相。以淨福德莊嚴其身。願一切衆生得上妙莊嚴相。以百福相莊嚴其身。願一切衆生得不雜亂莊嚴相。以一切相莊嚴其身。願一切衆生得善淨語言莊嚴相。具足種種無盡辯才。願一切衆生得一切功德聲莊嚴相。其音清淨。聞者喜悅。願一切衆生得可愛樂諸佛語言莊嚴相。令諸衆生聞法歡喜。修清淨行。願一切衆生得心莊嚴相。入深禪定。普見諸佛。願一切衆生得總持莊嚴相。照明一切諸佛正法。願一切衆生得智慧莊嚴相。以佛智慧莊嚴其心。

疏二十二施莊嚴具中十願。初一利他。後九自利。於中初三約身。次三約語。後三約意。其中言百福相。前文已引涅槃二十四說。依瑜伽五十三名百福行。故論云。復由百行所攝律儀。謂少分離殺。乃至邪見。爲一十二多分離殺等。三全分離。四少時離。五多時離。六盡壽離。七自離。八教人離。九以無量門稱。

揚讚述離。十見離殺等。深心慶悅。生大歡喜。十門各十。總說爲百行。所生福量亦爾。此且就同教三十。二相化身而說。若依此經。十身相海。隨一一相。無盡因成故。上普興雲幢主水神偈云。清淨慈門刹塵數。共生如來一妙相等故。餘可知。鈔依瑜伽五十三百福行。卽決擇分中文相甚顯。少分者。經部許有分受。或多或全。由彼根性有劣中上差別。及時有多時少時等。少時從一日至十日。多時謂一年已去。未至命終時耳。然其十種。分爲四類。初三十據事以分。次三十依時有別。次之二十約自他明後之。二十依讚說立。正約行時。名爲百行。約所生福。則爲百福。若就十惡。名爲百非。此且就同教者。第一會中已廣分別。卽師子吼品二十八經。南本二十六。

是爲菩薩摩訶薩。惠施一切莊嚴具時。善根迴向。爲令衆生具足一切無量佛法功德。智慧圓滿莊嚴。永離一切憍慢放逸故。

佛子。菩薩摩訶薩。以受灌頂自在王位。摩尼寶冠。及髻中珠。普施衆生。心無吝惜。常勤修習。爲大施主。修學施慧。增長捨根。智慧善巧。其心廣大。給施一切。

以彼善根如是迴向。所謂願一切衆生得諸佛法之所灌頂。成一切智。願一切衆生具足頂髻。得第一智。到於彼岸。願一切衆生以妙智寶。普攝衆生。皆令究竟功德之頂。願一切衆生皆得成就智慧寶頂。堪受世間之所禮敬。願一切衆生以智慧冠。莊嚴其首。爲一切法自在之王。願一切衆生智慧明殊。繫其頂上。一切世間無能見者。願一切衆生皆悉堪受世間頂禮。成就慧頂。照明佛法。願一切衆生首冠十力莊嚴之冠。智慧寶海。清淨具足。願一切衆生至大地頂。得一切智。究竟十力。破欲界頂。諸摩眷屬。願諸衆生得

成第一無上頂王。獲一切智光明之頂。無能映奪。

疏二十三施寶冠及髻珠。二事合一迴向。六智慧明珠等者。體圓德備。鑒徹惑亡。爲智明珠。極果所宗。故名頂上。是祕是妙。無能見者。亦以權隱實。名在髻中。開權顯實。故名解髻。文無解義。因使故來。若不明解。佛有祕藏。前後可知。鈔體圓德備等者。釋智明珠。此有二意。一直就智上。體圓者。顯是圓智。卽智性也。德備者。能成一切衆德故。卽是智相。鑒徹卽明照無遺。惑亡卽所知障盡。略舉珠之四德。二融於理智。爲涅槃三德。一體圓卽法身。二鑒徹卽般若。三惑亡爲解脫。德備通於三德。亦別屬法身。具足三德。方名圓智。亦以權隱實者。上直就佛智以明。今就法華經意。兼彰於教。以權隱覆實理。卽昔開三。三卽爲髻。隱一乘旨。從開權下。卽會三歸一文。無已下。成上開義。後若不明解下。出因使明之義。所以反顯佛無祕藏。故涅槃說。如來但有密語。而無密藏。如秋月十五日。欲令同見。豈有祕藏。衆生不了。謂之爲密。上言如來有祕密藏者。約下位不測耳。有約法體。無約佛心。佛心無恪故。

是爲菩薩摩訶薩。施寶冠時。善根迴向。爲令衆生得第一智。最清淨處。智慧摩尼妙寶冠故。佛子。菩薩摩訶薩。見有衆生。處在牢獄黑暗之處。枷鎖檢繫其身。起坐不安。衆苦競集。無有親識。無歸無救。裸露飢羸。酸劇難忍。菩薩見已。捨其所有一切財寶。妻子眷屬。及以自身。於牢獄中。救彼衆生。如大悲菩薩。妙眼王菩薩。旣救度已。隨其所須。普皆給施。除其苦患。令得安隱。然後施以無上法寶。令捨放逸。安住善根。於佛教中心無退轉。

疏二十四施妻子等救獄囚者。上來皆明外施。此下二段明無畏施。初一兼於內外之財。內財爲難。故

佛本行經說。昔五百長者子。各捨珍寶等施。有一貧人問求何願。云欲求佛道。自念貧無。以蜜塗身。冢間而捨。天帝試之。心安不動。知求佛果。而稱讚之。汝此勇猛。過彼五百菩薩所施百千億倍。當先作佛。彼貧人者。卽我身是。故知難中之難。施行有三。初覩境興悲。二如大悲下。指同先例。大悲卽觀自在也。以其偏主此門。故下文引例。皆準此知。後旣救度。下施以財法。迴向行十願。準思易了。鈔故佛本行經等者。具足經云。過去有五百長者子。各出珍寶象馬車乘衣服飲食。隨求悉與。有一貧人見而問之。曰。汝等施福。求何等耶。答欲求佛道。又問何謂佛道。答中廣歎佛德。貧人聞已。自念我今欲習學此。願度一切。復念貧窮。無財行施。當持己身。而用惠施。念已。索蜜徧塗其身。臥於冢間。我今以身施與一切。若有須血肉頭目髓腦。悉以與之。持是功德。用求佛道。廣度一切。作是願已。應時三千大千世界而大震動。諸天惶懼。帝釋天眼見於菩薩。臥於冢間。以身布施。下來欲試。化作衆狗鳥獸。欲食菩薩。見有欲來噉身。心便歡喜。無有退轉。傾動之意。天帝復形讚問所求。爲求輪王帝釋梵王。答云不爾。唯求佛道。廣度衆生。帝釋諸天同讚善哉。語菩薩言。汝此勇猛。過彼五百菩薩所施百千萬億不可計倍。當先作佛。時貧人者。今我身是。五百長者子者。今此彌勒五百菩薩是也。我以精進勇猛力故。超諸菩薩所作功德。而先成佛。

佛子。菩薩摩訶薩。於牢獄中救衆生時。以諸善根如是迴向。所謂願一切衆生。究竟解脫貪愛纏縛。願一切衆生。斷生死流。升智慧岸。願一切衆生。除滅愚癡。生長智慧。解脫一切煩惱纏縛。願一切衆生。滅三界縛。得一切智。究竟出離。願一切衆生。永斷一切煩惱結縛。到無煩惱無障礙地。智慧彼岸。願一切衆生。離

諸動念思惟分別。入於平等不動智地。願一切衆生脫諸欲縛。永離世間一切貪欲。於三界中無所染著。願一切衆生得勝志樂。常蒙諸佛爲說法門。願一切衆生得無著無縛解脫心。廣大如法界。究竟如虛空。願一切衆生得菩薩神通。一切世界調伏衆生。令離世間。住於大乘。是爲菩薩摩訶薩救度牢獄苦衆生時。善根迴向。爲令衆生普入如來智慧地故。

佛子。菩薩摩訶薩。見有獄囚。五處被縛。受諸苦毒。防衛驅逼。將之死地。欲斷其命。捨閣浮提。一切樂具。親戚朋友。悉將永訣。置高礎上。以刀屠割。或用木槍。豎貫其體。衣纏油沃。以火焚燒。如是等苦。種種逼迫。菩薩見已。自捨其身。而代受之。如阿逸多菩薩。殊勝行王菩薩。及餘無量諸大菩薩。爲衆生故。自捨身命。受諸苦毒。菩薩爾時。語主者言。我願捨身。以代彼命。如此等苦。可以與我。如治彼人。隨意皆作。設過彼苦。阿僧祇倍。我亦當受。令其解脫。我若見彼將被殺害。不捨身命。救贖其苦。則不名爲住菩薩心。何以故。我爲救護一切衆生。發一切智菩提心故。

佛子。菩薩摩訶薩。自捨身命。救衆生時。以諸善根。如是迴向。所謂願一切衆生。得無斷盡究竟身命。永離一切災橫逼惱。願一切衆生。依諸佛住。受一切智具。足十力。菩提記別。願一切衆生。普救含識。令無怖畏。永出惡道。願一切衆生。得一切命。入於不死。智慧境界。願一切衆生。永離怨敵。無諸厄難。常爲諸佛善友。所攝。願一切衆生。捨離一切刀劍兵仗。諸惡苦具。修行種種清淨善業。願一切衆生。離諸怖畏。菩提樹下。摧伏魔軍。願一切衆生。離大衆怖。於無上法。心淨無畏。能爲最上大師子吼。願一切衆生。得無障礙師子智慧。於諸世間。修行正業。願一切衆生。到無畏處。常念救護諸苦衆生。是爲菩薩摩訶薩。自捨身命。救彼

臨刑諸獄囚時。善根迴向。爲令衆生離生死苦。得於如來上妙樂故。
疏二十五捨身代死囚。一向內財。文四可知。

大方廣佛華嚴經疏鈔會本卷八十八

十迴向品第二十五

佛子。菩薩摩訶薩。布施乞者。連膚頂髻。

疏二十六。連膚頂髻。卽肉髻也。施行中三。初總標施行。

如寶髻王菩薩。勝妙身菩薩。及餘無量諸菩薩等。

疏二。如寶髻下。指物同修。

菩薩是時見乞者來。心生歡喜。

疏三。菩薩是時下。正明施行。於中六一。覩乞生欣。住種性故。

而語之言。汝今若須連膚頂髻。可就我取。我此頂髻。閻浮提中。最爲第一。作是語時。心無動亂。不念餘業。捨離世間。志求寂靜。究竟清淨。精勤質直。向一切智。

疏二。而語下。語意清淨。離二障故。

便執利刀。割其頭上連膚頂髻。右膝著地。合十指掌。一心施與。

疏三。便執下。身業正捨。事業勝故。

正念三世一切諸佛菩薩所行。發大歡喜。增上志樂。

疏四。正念下。欣慕上流。意樂勝故。

於諸法中。意善開解。不取於苦。了知苦受。無相無生。諸受互起。無有常住。

疏五於諸法下。巧安諦理。無相攝故。

是故我應同去來。今一切菩薩。修行大捨。發深信樂。求一切智。無有退轉。不由他教。善知識力。

疏六是故下。決志思齊。依止勝故。此及迴向。有七最勝。成波羅蜜。前後諸施。文多略無。

菩薩摩訶薩。作是施時。以諸善根。如是迴向。所謂願一切衆生。得無見頂。成就菩薩如塔之髻。願一切衆生。得紺青髮。金剛髮。細軟法。能滅衆生一切煩惱。願一切衆生。得潤澤髮。密緻髮。不侵鬢額髮。願一切衆生。得柔輭髮。盡於鬢額而生髮。願一切衆生。得如己字髮。螺文右旋髮。願一切衆生。得佛相髮。永離一切煩惱結習。願一切衆生。得光明髮。其光普照十方世界。願一切衆生。得無亂髮。如來髮淨妙無雜。願一切衆生。得成應供頂塔之髮。令其見者。如見佛髮。願一切衆生。皆得如來無染著髮。永離一切暗翳塵垢。

疏二菩薩下。迴向行中十願。一無見頂者。縱窮上界。亦有餘故。言如塔者。菩薩敬故。二堅。無中斷故。五中靜法云。準梵本。令得二相髮。謂室利鞞蹉。塞縛悉底迦相髮。義如前說。六云。得佛相髮。準梵本。卻是右旋。餘可知。

是爲菩薩摩訶薩。施連膚髻時。善根迴向。

爲令衆生。其心寂靜。皆得圓滿。諸陀羅尼。究竟如來一切種智。十種力故。

疏迴向所爲中。總綰諸髮成髻圓滿。故云爾也。

佛子。菩薩摩訶薩。以眼布施諸來乞者。如歡喜行菩薩。月光王菩薩。及餘無量諸菩薩等。所行惠施。

疏二十七施眼。智論十四。說施有三種。飲食爲下。珍寶爲中。頭目五藏爲上。廣如彼說。文中施行內有四。一標章引例。鈔經云。及餘無量菩薩者。賢愚經第六。快目王施眼。說過去阿僧祇劫。有王名爲快目。其目徹過牆壁。見四十里。王八萬四千國。性善好施。有邊國王名波羅陀拔彌。不賓王化。治政失度。快目王舉兵往伏。彼王有臣云。快目王好施。令一盲婆羅門從其乞眼。快目便許之。七日後施。臣佐悲諫。太子請以眼代。快目王廣爲說法。令剎一眼。置於掌中。廣發大願。後置婆羅門眼中。彼卽得視。復剎一眼。置彼匡中。亦卽得視。大地震動。諸天下讚。帝釋問王。施眼何求。答。唯求佛道。問有悔心不。答。言無悔。若不悔者。令我如故。尋便平復。婆羅門回奏報彼王。彼王聞已。心裂而死。

菩薩摩訶薩布施眼時。起清淨施眼心。起清淨智眼心。起依法光明心。起現觀無上佛道心。發迴向廣大智慧心。發與三世菩薩平等捨施心。發於無礙眼起不壞淨信心。於其乞者。起歡喜攝受心。

疏二菩薩摩訶薩下發起勝心。

爲究竟一切神通故。爲生佛眼故。爲增廣大菩提心故。爲修習大慈悲故。爲制伏六根故。於如是法而生其心。

疏三爲究竟下。明行心所爲。可知。

佛子。菩薩摩訶薩布施眼時。於其乞者。心生愛樂。爲設施會。增長法力。捨離世間愛見放逸。除斷欲縛。修習菩提。隨彼所求。心安不動。不違其意。皆令滿足。而常隨順。無二捨行。

疏四佛子下。彰施儀式。

以此善根如是迴向。所謂願一切衆生得最勝眼。示導一切。願一切衆生得無礙眼。開廣智藏。願一切衆生得淨肉眼。光明鑒照。無能蔽者。願一切衆生得淨天眼。悉見衆生生死業果。願一切衆生得淨法眼。能隨順入如來境界。願一切衆生得智慧眼。捨離一切分別。取著願一切衆生。具足佛眼。悉能覺悟一切諸法。願一切衆生成就普眼。盡諸境界。無所障礙。願一切衆生成就清淨離癡翳眼。了衆生界。空無所有。願一切衆生。具足清淨無障礙眼。皆得究竟如來十力。

疏二迴向行願成十眼。與離世間大同小異。鈔願成十眼等者。今略會之。彼十眼者。一所謂肉眼。見一切色故。二天眼。見一切衆生心故。三慧眼。見一切衆生諸根境界故。四法眼。見一切衆生實相故。五佛眼。見如來十力故。六智眼。知見諸法故。七光明眼。見佛光明故。八出生死眼。見涅槃故。九無礙眼。所見無際故。十一切智眼。見普門法界故。若會今文。一卽第八示導衆生。令出生死。得涅槃證。爲最勝故。二卽第九名義全同。次五卽五眼。用小有異。多同尋常五眼。八卽第十名同所見。從能見智。是佛一切智。雙就能所。故名普眼。九卽光明眼。從其能照。名爲光明。身智二光。照生性空。就其離過。名淨離翳。十卽智眼。如來十力。方見諸法故。然彼約菩薩。此願得佛。因果小異。故用小殊。大旨同也。故疏云大同小異。

是爲菩薩摩訶薩。布施眼時善根迴向。爲令衆生得一切智清淨眼故。

佛子。菩薩摩訶薩能以耳鼻施諸乞者。如勝行王菩薩。無怨勝菩薩。及餘無量諸菩薩等。疏二十八施耳鼻中。二事合明。施行別顯迴向。而文但三。今初施行有二。一標章引例。

布施之時。親附乞者。專心修習諸菩薩行。具佛種性。生如來家。念諸菩薩所修施行。常勤發起諸佛菩提。清淨諸根功德智慧。觀察三有無一堅固。願常得見諸佛菩薩。隨順憶念一切佛法。知身虛妄。空無所有。無所貪惜。菩薩如是施耳鼻時。心常寂靜。調伏諸根。勉濟衆生。險惡諸難。生長一切智慧功德。入大施海。了達法義。具修諸道。依智慧行。得法自在。以不堅身。易堅固身。

疏二。布施之時。下。安住勝心。一具佛種性。卽安住最勝。二念諸下。事業最勝。三常勤下。依止最勝。四隨順下。清淨最勝。五勉濟下。意樂最勝。六生長下。巧便最勝。鈔具佛種性者。謂具七最勝。成波羅蜜。如

第一會

佛子。菩薩摩訶薩。布施耳時。以諸善根如是迴向。所謂願一切衆生。得無礙耳。普聞一切說法之音。願一切衆生。得無障耳。悉能解了一切音聲。願一切衆生。得如來耳。一切聰達。無所擁滯。願一切衆生。得清淨耳。不因耳處。生分別心。願一切衆生。得無聾瞶耳。令蒙昧謙。畢竟不生。願一切衆生。得徧法界耳。悉知一切諸佛法音。願一切衆生。得無礙耳。開悟一切無障礙法。願一切衆生。得無壞耳。善知諸論。無能壞者。願一切衆生。得普聞耳。廣大清淨。爲諸耳王。願一切衆生。具足天耳。及以佛耳。

疏二。迴向行中。先耳十願。初及第七。俱名無礙者。準梵本。初名無著。瞶者。從生卽聾。故爲耳王者。聞與不聞。皆自在故。

是爲菩薩摩訶薩。布施耳時。善根迴向。爲令衆生。皆悉獲得清淨耳故。
佛子。菩薩摩訶薩。布施鼻時。

疏後施鼻迴向中有四初牒起。

如是迴向。所謂願一切衆生。得降直鼻。得隨好鼻。得善相鼻。得可愛樂鼻。得淨妙鼻。得隨順鼻。得高顯鼻。得伏怨鼻。得善見鼻。得如來鼻。

疏二正顯中有二願。前一願得十鼻。言隨好者。兩孔不現故。善相者。相海品云。如來鼻有大人相。名一切神通智慧雲故。隨順鼻者。隨宜所現故。

願一切衆生。得離恚怒面。得一切法面。得無障礙面。得善見面。得隨順面。得清淨面。得離過失面。得如來圓滿面。得徧一切處面。得無量美好面。

疏後一願得十面。鼻居面中。好醜由起。故相從立願。一切法者。正向諸法故。是爲菩薩摩訶薩布施鼻時善根迴向。

疏是爲下結。

爲令衆生究竟得入諸佛法故。爲令衆生究竟攝受諸佛法故。爲令衆生究竟了知諸佛法故。爲令衆生究竟住持諸佛法故。爲令衆生究竟常見諸如來故。爲令衆生皆悉證得佛法門故。爲令衆生究竟成就無能壞心故。爲令衆生皆能照了諸佛正法故。爲令衆生普悉嚴淨諸佛國土故。爲令衆生皆得如來大威力身故。

疏四爲令下。迴向所爲有十。以鼻香氣所入故。攝受香故。了知故。住於覺故。如眼見色故。合中知故。不壞鼻根故。不邪分別故。香氣嚴潔故。五分法身香故。

是爲菩薩摩訶薩。施耳鼻時善根迴向。佛子。菩薩摩訶薩安住堅固自在地中。能以牙齒施諸衆生。猶如往昔華齒王菩薩。六牙象王菩薩。及餘無量諸菩薩等。

疏二十九施牙齒。初施行中。安住堅固自在位者。登地已上故。智論十四云。象王施牙。是法身菩薩。事廣如彼。及十輪第四。鈔論云。如釋迦文佛。曾爲六牙白象。獵者伺便。以毒箭射之。諸象競至。欲來踢殺獵者。白象以身捍之。擁護其人。愍之如子。曉喻慇懃。遮止羣象。徐問獵人。何故射我。答曰。我須汝牙。卽以六牙。內石孔中。血肉俱出。以鼻舉牙。授與獵者。雖曰象身。用心如是。當知此象。非畜生行報。阿羅漢法中。都無此心。當知此爲法身菩薩。及十輪者。經云。若有苾芻。於諸根本性重罪中。隨犯一罪。雖名破戒。惡行苾芻。猶勝一切在家白衣。犯性罪者。尙應如是。況犯其餘諸小遮罪。是故不許國王大臣。諸在家者。輕慢譴罰。所以者何。善男子。乃至過去有迦奢國王。名曰梵授。敕五旃陀羅。有大象王。名青蓮華。六牙具足。住雪山邊。汝可往彼。拔取牙來。若不得者。汝等五人。定無活義。時旃陀羅。爲護身命。執持弓箭。被赤袈裟。現於沙門威儀形相。往雪山邊。至象王所。彼母象遙見人來。執持弓箭。驚怖馳走。詣象王所。白言。大天。今見有人。張弓挾箭。徐行覘視。來趣我等。將非我等。命欲盡耶。象王聞已。舉目觀見。鬚除鬚髮。著袈裟人。卽爲母象。而說偈言。被菟伽沙等。諸佛法幢相。觀此離惡心。必不害衆生。時彼母象。以頌答曰。雖知被法服。而執於弓箭。是惡旃陀羅。樂惡無悲愍。時大象王。復說頌言。見袈裟一相。知是慈悲本。此必歸佛者。愍念諸衆生。汝勿懷疑慮。宜應速攝心。被此法衣人。欲度生死海。時旃陀羅。卽以

毒箭變弓審射。中象王心。母象見之。悲號叫哭。聲哀哽咽。以頌白曰。被此法衣人。宜應定歸佛。威儀雖寂靜。而懷毒惡心。應速蹋彼身。令其命根斷。滅此怨令盡。以射天身故。時大象王。以頌答曰。寧速捨身命。不應生惡心。彼雖懷詐心。猶似佛弟子。智者非爲命。而壞清淨心。爲度諸有情。當習菩薩行。時大象王心生悲愍。徐問人言。汝何所須。彼人答言。欲須汝牙。象王歡喜。卽自拔牙。施旃陁羅。而說頌曰。我以白牙今施汝。無忿無恨無貪惜。願以施福。當成佛。滅除衆生煩惱病。善男子。當觀如是過去象王。雖受如是傍生趣身。爲求阿耨多羅三藐三菩提故。而能棄捨身命。無慙恭敬尊重。著袈裟人。雖彼爲怨。而不加報。然未來世。有利帝利旃陁羅王。宰官居士長者沙門婆羅門等。歸於我法。而出家者。若是法器。若非法器。弟子諸所惱亂訶罵。或以鞭杖楚撻其身。或閉牢獄。乃至斷命。此於一切過去未來現在諸佛。犯諸大罪。決定當趣無間地獄。斷滅善根。焚燒相續。一切智者之所遠離。莊嚴論十三亦云。昔釋迦牟尼爲菩薩時。作六牙白象王。時王夫人。與象有怨。卽募人取。與一牝象。別處而住。獵師服袈裟。懷挾弓箭。屏樹徐行。牝象語象王。象王問彼。著何衣服。云著袈裟。象王答云。何所怖畏。亦說偈云。如是的幢相。不害於外物。內有慈悲心。常護於一切。於是獵人卽射毒箭。牝象乃云。大天。云有慈悲。何以爲此。象王偈云。此是解脫服。煩惱之所作。遠離於慈悲。悉非衣服過。牝象欲害王。言何不洽結。使復說偈云。如人鬼入心。癡狂毀罵鬻鬻師。治於鬼。不責病苦人。羣象尋來。王恐傷之。向彼獵師安之腹下。遣去羣象。獵師感之。悲泣流淚。象王撫之。問爲何來。獵師答云。王遣取牙。象王命取云。不敢取。象王遂以鼻絞牙。良久而出。血大流出。痛苦戰掉。有天說偈言。心當堅安住。莫爲愚癡悶。當觀苦惱衆。云何可濟拔。復有

天云。弟子拔牙苦。悲念於地獄。拔已而住。獵師思惟。將無悔耶。象王知念。說偈勸取。以鼻擊牙。而授與之。釋曰。緣起小異。大意皆同。而牙有出沒。又爲難行。故重重引證。

菩薩摩訶薩。施牙齒時。其心清淨。希有難得。如優曇華。所謂無盡心施。大信心施。步步成就。無量捨心施。調伏諸根心施。一切悉捨心施。一切智願心施。安樂衆生心施。大施。極施。勝施。最勝施。輟身要用。無所嫌恨心施。

菩薩爾時。以諸善根如是迴向。所謂願一切衆生。得銛白牙齒。成最勝塔。受天人供。願一切衆生。得齊平牙齒。如佛相好。無有疎缺。願一切衆生。得調伏心。善趣菩薩波羅蜜行。願一切衆生。口善清淨。牙齒鮮白。分明顯現。願一切衆生。得可憶念莊嚴牙齒。其口清淨。無可惡相。願一切衆生。牙齒成就。具滿四十。常出種種希有妙香。願一切衆生。意善調伏。牙齒鮮潔。如白蓮華。文理迴旋。卍字成就。願一切衆生。口唇鮮淨。牙齒潔白。放無量光。周徧照耀。願一切衆生。牙齒堅利。食無完粒。無所味著。爲上福田。願一切衆生。於牙齒間。常放光明。授諸菩薩第一記莢。

疏二菩薩下。迴向行十願。唯第三單約心說。謂智能調惑。趣於彼岸。如牙調食。以資法身。餘皆約牙齒說。萬字成就者。若梵本但云右旋。及有樂耳。放無量光者。卽如相海品說。

是爲菩薩摩訶薩。施牙齒時。善根迴向。爲令衆生具一切智。於諸法中。智慧清淨故。

佛子。菩薩摩訶薩。若有人來從乞舌時。於乞者所。以慈悲心。軟語愛語。猶如往昔端正面王菩薩。不退轉菩薩。及與無量諸菩薩等。佛子。菩薩摩訶薩。於諸趣中。而受生時。有無量百千億那由他衆生。而來乞舌。

菩薩爾時安置其人於師子座。以無恚心。無害心。無恨心。大威德心。從佛種性所生心。住於菩薩所住心。常不濁亂心。住大勢力心。於身無著心。於語無著心。兩膝著地。開口出舌。以示乞者。慈心。軟語。而告之言。我今此身。普皆屬汝。可取我舌。隨意所用。令汝所願。皆得滿足。

菩薩爾時以諸善根。如是迴向。所謂願一切衆生得周普舌。悉能宣示諸語言法。願一切衆生得覆面舌。所言無二。皆悉真實。願一切衆生得普覆一切佛國土舌。示現諸佛自在神通。願一切衆生得輒薄舌。恆受美妙清淨上味。願一切衆生得辯才舌。能斷一切世間疑網。願一切衆生得光明舌。能放無數萬億光明。願一切衆生得決定舌。辯說諸法。無有窮盡。願一切衆生得普調伏舌。善能開示一切祕要。所有言說。皆令信受。願一切衆生得普通達舌。善入一切語言大海。願一切衆生得善說一切諸法門舌。於言語智。悉到彼岸。

疏三十施舌願中。初卽相海品廣長舌相。餘可知。

是爲菩薩摩訶薩。布施舌時善根迴向。爲令衆生皆得圓滿無礙智故。

佛子。菩薩摩訶薩。以頭布施諸來乞者。如最勝智菩薩。及大丈夫迦尸國王等諸大菩薩。所行布施。

疏三十一施頭。初施行中。三初標章引證。引迦尸國王者。又本行經。說月光王報恩第五。名大光王施

頭與婆羅門。具說如彼。鈔迦尸國王。未見名同月光王。緣十藏品已。引菩薩本緣經。亦有大同小異。

爲欲成就入一切法最勝智首。爲欲成就證大菩提救衆生首。爲欲具足見一切法最第一首。爲得正見清淨智首。爲欲成就無障礙首。爲欲證得第一地首。爲求世間最勝智首。欲成三界無能見頂淨智慧首。

爲得示現。普到十方智慧王首。爲欲滿足一切諸法。無能破壞自在之首。

疏次爲欲下。顯施所爲。爲有十種。皆約佛智。隨義不同。一入理。二導悲。三見事。四離障。五融事理。六爲所依。七超劣。八見無初相。九現用自在。十卽事而真。故不可壞。

佛子。菩薩摩訶薩。安住是法。精勤修習。則爲已入諸佛種性。學佛行施。於諸佛所。生清淨信。增長善根。令諸乞者。皆得喜足。其心清淨。慶悅無量。心淨信解。照明佛法。發菩提意。安住捨心。諸根悅豫。功德增長。生善樂欲。常好修行。廣大施行。

疏後佛子下。正顯施行。亦具最勝。可以意得。

菩薩爾時。以諸善根。如是迴向。所謂願一切衆生。得如來頭。得無見頂。於一切處。無能映蔽。於諸佛刹。最爲上首。其髮右旋。光淨潤澤。卍字嚴飾。世所希有。具足佛首。成就智首。一切世間最第一首。爲具足首。爲清淨首。爲坐道場圓滿智首。

疏二菩薩下。迴向行等可知。

是爲菩薩摩訶薩。布施頭時。善根迴向。爲令衆生。得最勝法。成於無上大智慧故。佛子。菩薩摩訶薩。以其手足。施諸衆生。如常精進。菩薩無憂王菩薩。及餘無量諸菩薩等。於諸趣中。種種生處。布施手足。

疏三十二施手足。二事合願。文但有三。初施行亦三。初標章引證。

以信爲手。起饒益行。往反周旋。勤修正法。願得寶手。以手爲施。所行不空。具菩薩道。常舒其手。擬將廣惠。

安步遊行。勇猛無怯。以淨信力。具精進行。除滅惡道。成就菩提。

疏次以信下。標因所果。信爲手因。果能兩寶。行爲足因。果普游步等。

佛子。菩薩摩訶薩。如是施時。以無量無邊廣大之心。開淨法門。入諸佛海。成就施手。周給十方。願力任持。一切智道。住於究竟離垢之心。法身智身。無斷無壞。一切魔業。不能傾動。依善知識。堅固其心。同諸菩薩。修行施度。

疏後佛子下。淨心正施。於中初施手心。願力已下。明施足心。如足住地。能持身故。願住智地。能成智身。離心垢故。能顯法身。法身湛然。故不可壞。智證永續。故無有斷。

佛子。菩薩摩訶薩。爲諸衆生。求一切智。施手足時。以諸善根。如是迴向。所謂願一切衆生。具神通力。皆得寶手。得寶手已。各相尊敬。生福田想。以種種寶。更相供養。又以衆寶。供養諸佛。興妙寶雲。徧諸佛土。令諸衆生。互起慈心。不相惱害。遊諸佛刹。安住無畏。自然具足。究竟神通。

疏二佛子下。明迴向行文二。初廣辨一用手。能兩寶足。能游刹。

又令皆得寶手。華手。香手。衣手。蓋手。華鬘手。末香手。莊嚴具手。無邊手。無量手。普手。得是手已。以神通力。常勤往詣。一切佛土。能以一手。徧摩一切諸佛世界。以自在手。持諸衆生。得妙相手。放無量光。能以一手。普覆衆生。成於如來手指網縵。赤銅爪相。菩薩爾時。以大願手。普覆衆生。願一切衆生。志常樂求。無上菩提。出生一切功德大海。見來乞者。歡喜無厭。入佛法海。同佛善根。

疏次又令下。略舉諸手之用。

是爲菩薩摩訶薩。施手足時善根迴向。

佛子。菩薩摩訶薩。壞身出血。布施衆生。如法業菩薩。善意王菩薩。及餘無量諸菩薩等。

疏三十三壞身出血。施文亦唯三。施行引例。及下施髓。並如智論十四中說。鈔及下施髓。並在智論者。論云。月光太子。出行遊觀。癩人見之。要車。自言我身重病。辛苦懊惱。太子嬉遊。獨自歡耶。大慈愍念。願見救療。太子聞之。以問諸醫。醫言常須從生長大無瞋之人。血髓塗而飲之。如是可愈。太子念言。設有此人。貪生惜壽。云何可得。自除我身。無可得處。卽命旃陁羅。令除身肉。破骨出髓。以塗病人。以血飲之。

於諸趣中。施身血時。起成就一切智心。起欣仰大菩提心。起樂修菩薩行心。起不取苦受心。起樂見乞者心。起不嫌來乞心。起趣向一切菩薩道心。起守護一切菩薩捨心。起增廣菩薩善施心。起不退轉心。不休息心。無戀已心。

以諸善根如是迴向。所謂願一切衆生。皆得成就法身智身。願一切衆生。得無勞倦身。猶如金剛。願一切衆生。得不可壞身。無能傷害。願一切衆生。得如變化身。普現世間。無有盡極。願一切衆生。得可愛樂身。淨妙堅固。願一切衆生。得法界生身。同於如來。無所依止。願一切衆生。得如妙寶光明之身。一切世人。無能映蔽。願一切衆生。得智藏身。於不死界。而得自在。願一切衆生。得寶海身。見皆獲益。無空過者。願一切衆生。得虛空身。世間惱患。無能染著。

是爲菩薩摩訶薩。施身血時。以大乘心。清淨心。廣大心。欣悅心。慶幸心。歡喜心。增上心。安樂心。無濁心。善

根迴向。

佛子。菩薩摩訶薩。見有乞求。其身髓肉。歡喜輕語。謂乞者言。我身髓肉。隨意取用。如饒益菩薩。一切施王菩薩。及餘無量諸菩薩等。

疏三十四施身髓肉中二事合願。初施行中三。初標章引證。

於諸趣中。種種生處。以其髓肉。施乞者時。歡喜廣大。施心增長。同諸菩薩。修習善根。離諸塵垢。得深志樂。以身普施。心無有盡。具足無量。廣大善根。攝受一切妙功德寶。如菩薩法。受行無厭。心常愛樂。布施功德。一切周給。心無有悔。審觀諸法。從緣無體。不貪施業。及業果報。隨所會遇。平等施與。

疏次於諸趣下。正顯行相。

佛子。菩薩摩訶薩。如是施時。一切諸佛。皆悉現前。想之如父。得護念故。一切衆生。皆悉現前。普令安住。清淨法故。一切世界。皆悉現前。嚴淨一切佛國土故。一切衆生。皆悉現前。以大悲心。普救護故。一切佛道。皆悉現前。樂觀如來十種力故。去來現在一切菩薩。皆悉現前。同圓滿諸善根故。一切無畏。皆悉現前。能作最上師子吼故。一切三世。皆悉現前。得平等智。普觀察故。一切世間。皆悉現前。發廣大願。盡未來劫。修菩提故。一切菩薩。無疲厭行。皆悉現前。發無數量廣大心故。

疏後佛子下。彰施現益。

佛子。菩薩摩訶薩。施髓肉時。以此善根。如是迴向。所謂願一切衆生。得金剛身。不可沮壞。願一切衆生。得堅密身。恒無缺減。

願一切衆生。得意生身。猶如佛身。莊嚴清淨。

疏二迴向十願三云。意生身者。七卷楞伽第二云。譬如意去。速疾無礙。名意生身。此乃意是舉喻。鈔此乃等者。彼經意生身下。便云。大慧譬如心意。於無量百千由旬外。憶先所見種種諸物。念念相續。疾詣於彼。非是其身及山河石壁所能爲礙。意生身者。亦復如是。故云喻也。

疏然此身類。有三種。一三昧樂。二覺法自性。三種類俱生無作行。鈔然此身類下。二顯別類三。一列名。今依七卷。若依四卷。初名三昧樂。正受第二名中有重性字。然三段俱是七卷第四。若依四卷。卽當第三。今更引四卷對決。四卷地位。便在釋相之中。最初列竟。卽云。修行者了知初地上增進相。得三種身。

疏初者。楞伽第四云。謂入於三昧。離種種心。寂然不動。心海不起。轉識波浪。了境心現。皆無所有。鈔。楞伽下第二釋相。卽七卷。若第四但略結名。及地位耳。地位一同四卷。留待辨位。明故。初身四卷云。大慧云。何三昧樂。正受意生身。謂第三第四第五地。三昧樂。正受故。種種自心寂靜。安住心海。起浪識相不生。知自心現。非境界性。是名三昧樂。正受意生身。釋曰。斯則七卷文簡而顯然。四卷疏意云。從初至七。皆觀三界心意識境界妄想。是故須入三昧。滅心意識。以起意生法身。經隱前二。沒後二地。略舉中間。從種種自心下。出體。亦有解云。初二約位。未得定故。不說意生身。六七以得般若。常在無相。故屬第二身。今疏依此。故下約位云。五地前。

疏云。何覺法自性。謂了法如幻。皆無有相。心轉所依。依如幻定。及餘三昧。能現無量自在神通。如華開。

敷速疾如意。如幻如夢。如影如像。非四大造。與造相似。一切色相。具足莊嚴。普入佛刹。了諸法性。故鈔云。何覺法自性等者。四卷云。大慧云。何覺法自性。意生身。謂八地觀察。覺了如幻等法。悉無所有。身心轉變。得如幻三昧。及餘三昧門。無量相力自在。明如妙華莊嚴。迅疾如意。猶如幻夢水月鏡像。非造非所造。如造所造。一切色種種支分。具足莊嚴。隨入一切佛刹。大衆通達自性法故。是名覺法自性。性意生身。釋曰。二經相對。居然可見。彼疏釋云。謂八地菩薩。覺一切法無自性。故名覺法自性。性意生身也。經文釋中。由八地已上。滅心意識。覺知諸法無所有。故得如幻等無量三昧門也。從無量相下。三昧所起。德用於三昧中。得自在。故名力自在。明以此功德莊嚴其身。故云如妙華嚴也。法性生身。隨念所起。如意迅疾也。從猶如下。所起化身不實也。非四大造。如四大造色也。從一切色下。辨莊嚴具足。隨入下。入佛境界。以化生也。通達自性法故者。釋能化所以也。

疏云。何種類俱生無作行。謂了達諸佛自證法相。釋曰。初身從所依定爲名。次身從所依智立稱。三自證法相。義兼定慧。及法性相。故名種類。由此故能隨衆生類種種。一時現生。任運而成。云無作行。鈔云。何種類下。明第三身。四卷經云。大慧云。何種類俱生無作行。意生身。所謂覺一切佛法。緣自得樂相。是名種類俱生無作行。意生身。釋曰。彼疏釋云。得如來法身。隨衆生類。以現其形。而不作意。故立其名。言覺一切佛法者。如來覺知一切佛法也。緣自得樂相者。緣自內心所證。自覺聖智樂相。欲與衆生。故作種類身也。大雲釋云。以八地深證。無相於一切法。不能圓滿。故爲佛訶。得勸使修。至九地便獲四無礙智。具修一切佛法。覺一切法。皆是法界。以覺卽法界。緣內證真如。得寂滅之樂。與一切法無差別矣。

釋曰。此但說菩薩覺一切法。前是恭法師意。謂佛覺也。理實通二。今疏分二。先略引經正釋。義當佛覺。諸法從釋曰。下將釋第三。便騰前二。顯三得名。從三自證法下。正釋第三得名。便釋俱生種類之義。疏若依地位。初卽五地前。次卽八地前。後卽八地後。鈔初卽五地前者。自有二意。一依密嚴第三。初地卽得意生身。則通五地。二依上四卷七卷經。皆以三四五地當其初身。以初二地未得定故。故十卷。楞伽第五云。三地修定。得三昧樂意生身。八地證無生故。得覺法自性意生身。第三身不配地位。斯則初身。以初攝後。云三地得。第二身。以後攝初。云八地得。故疏云。八地已前。由六七地已得般若。常在無相。是故覺法自性攝。不爾。三得第一。八得第二。初唯至五。則六七地。何無意生。明是以後攝初耳。三不配者。三本。楞伽總皆不配。既以八地向。前爲第二。則三卽九地。至十乃至如來。居然可知耳。有云。所以已見上文。若無上依經第一。不配地位。但約三人得。謂聲聞緣覺大地菩薩。若勝鬘經云。無明習地爲緣。無漏業爲因。有阿羅漢緣覺。自在菩薩。三種意生身。西域自有二解。勝鬘一依。楞伽二依。無上依。前中復有三說。羅漢緣覺。回心。至十信。仍本名故。名爲二乘。至十迴向終。名自在菩薩。卽初地已上。對前二位。故名自在。初地已上。卽有三種。如前。楞伽一云。羅漢緣覺俱迴心。俱至十迴向終。方名羅漢緣覺。直往菩薩。初地已上。名自在菩薩。菩薩亦有三種意生身。一云。聲聞緣覺同第二釋。從二乘有學迴心。至迴向終。名自在菩薩。對未發心。得名自在。三身得同前二解。二據無上依。隨三乘人。卽爲三身。前二迴心。至等覺位。名聲聞緣覺。意生身後。一初地至等覺。名菩薩意生身。釋曰。後釋似非得意。經意俱明。三乘人。皆得三意生身耳。

疏若成唯識第八名爲意成。隨意願成故。意明但轉變成。非新生故。故論又云。亦名變化身。無漏定力。轉令異本。如變化故。鈔若成唯識下三彰異名。唯識因解變易生死名云。由悲願力。改轉身命。無定齊限。故名變易。無漏定願。正所資感。妙用難測。名不思議。或名意成身。隨意願成故。彼釋云。隨大悲意之所成耳。意明已下。是疏釋論。然此異名。總有其三。一名不思議變易身。二名變化身。三名意成身。若出體者。總有三說。一云悲願爲體。二云定願爲性。三云無明住地惑。無漏有分別業爲性。若問答者。問若所依身。隨地有別。可說短長。而命如燈燄。念念生滅。非如分段一期等事。憑何說彼無定齊限。答。玄奘三藏解云。理實命根無別分限。隨所依身。假說分限。問若依悲願而感此身。故留煩惱。此復何用。諸法師答云。七地已來。自有菩薩受分段身。故留不斷。八地上。雖受變易。而與聖道不相違故。所以不斷。又解八地上。變易生死。還相假籍。故留不斷。由此惑力。資別業力。得受用身。非如無學迴心大者。唯依一業。問若所知障助業。能惑生死。二乘定性。應不永入無餘涅槃。釋曰。小乘問也。二乘既有所知障。則常感生死。不入涅槃。論主答云。如諸異生。拘煩惱故。釋曰。異生有煩惱。不趣涅槃。彼趣寂者。心樂趣寂。爲此心拘。馳流無相。不起無上正等菩提。如諸異生。爲煩惱拘。故論問云。如何道諦實能感苦。釋曰。以無漏有分別業。卽是道故。論答云。誰言實感。不爾。如何下。論主答。無漏定願。資有漏業。令所得果。相續長時。展轉增勝。假說名感。如是感時。由所知障爲緣助力。非獨能感。然所知障。不障解脫。無能發業。潤生用。故釋曰。謂第四禪無漏勝定。資色無色。已感異熟。諸有漏業。令所得果。相續增長。無漏資勝。假說能感。非無漏業。實能感苦。又此能感。由所知障助故。所知障不感苦者。不同煩惱障有發潤。故論

云彼復何須所知障助。論答云。既未圓證。無相大悲。不執菩提。有情實有。無由發起。猛利悲願。餘可略也。

疏上皆通因。今卽十身之一。義取亦通後一。廣如別章。

願一切衆生得百福相身三十二相。而自莊嚴。

疏四云。百福相身。此舉三十二相之通因。若別因者。如涅槃師子吼品。鈔百福相等者。百福十行品中已辨。三十二相。至法界品瞿波處廣說。

願一切衆生得八十種好。妙莊嚴身。具足十力。不可斷壞。

疏五八十種好者。謂皆殊妙。立隨好名。具如瑜伽四十九。大般若三百八十一說。餘文可知。鈔八十種好。今當略示。大般若三百八十一。今當具引。經云。善現。云何如來應正等覺。八十隨好。善現。一世尊指爪狹長。薄潤光潔。鮮淨如花。作赤銅色。二世尊手足指圓纖長。臚直柔輭。節骨不現。三世尊手足各等無差。於諸指間。悉皆充密。四世尊手足圓滿如意。輭淨光澤。色如蓮華。五世尊筋脈。繫結堅固。深隱不現。六世尊兩踝。俱隱不現。七世尊行步。直進。庠審。如龍象王。八世尊行步。威容齊肅。如師子王。九世尊行步。安平庠序。不過不減。猶如牛王。十世尊行步。進止儀雅。猶如鵝王。十一世尊迴顧。必皆右旋。如龍象王。舉身隨轉。十二世尊支節。漸次臚圓。妙善安布。十三世尊骨節。交結無隙。猶如龍盤。十四世尊膝輪。妙善安布。堅固圓滿。十五世尊隱處。其文妙好。威勢具足。圓滿清淨。十六世尊身支。潤滑柔輭。光悅鮮淨。塵垢不著。十七世尊身容。敦肅無畏。常不怯弱。十八世尊身支。堅固稠密。善相屬著。十九世尊

身支安定敦重。常不掉動。圓滿無壞。二十世尊身相。猶如仙王。周帀端嚴。光淨離翳。二十一世尊身有周帀圓光。於行等持。常自照耀。二十二世尊腹形方正無欠。柔軟不現。衆相莊嚴。二十三世尊臍深。右旋圓妙。清淨光澤。二十四世尊臍厚。不窳不凸。周帀妙好。二十五世尊身皮遠離疥癬。亦無黥點。疣贅等過。二十六世尊手掌充滿柔軟。足下安平。二十七世尊手文深長。明直潤澤。不斷。二十八世尊唇色光潤丹輝。如頻婆果。上下相稱。二十九世尊面門不長不短。不大不小。如量端嚴。三十世尊舌相。軟薄廣長。如赤銅色。三十一世尊發聲威震深遠。如象王吼。明朗清徹。三十二世尊音韻美妙。具足如深谷響。三十三世尊鼻高修而且直。兩孔不現。三十四世尊諸齒方整鮮白。三十五世尊諸牙圓白光潔。漸次鋒利。三十六世尊眼淨清白分明。三十七世尊眼相修廣。譬如青蓮華葉。甚可愛樂。三十八世尊眼睫上下齊整。稠密不白。三十九世尊雙眉長而不白。緻而細軟。四十世尊雙眉綺靡順次。紺瑠璃色。四十一世尊雙眉高顯光潤。形如初月。四十二世尊耳厚廣大。修長輪埵成就。四十三世尊兩耳綺麗齊平。離衆過失。四十四世尊容儀能令見者無捨無染。皆生愛敬。四十五世尊額廣圓滿。正形相殊妙。四十六世尊身分上半圓滿。如師子王威嚴。無對。四十七世尊首髮修長紺青。稠密不白。四十八世尊首髮香潔細軟。潤澤旋轉。四十九世尊首髮齊整無亂。亦不交雜。五十世尊首髮堅固不斷。永無折落。五十一世尊首髮光滑殊妙。塵垢不著。五十二世尊身分堅固充實。逾那羅延。五十三世尊身體長大。端直。五十四世尊諸竅清淨圓好。五十五世尊身支勢力殊勝。無與等者。五十六世尊身相衆所樂觀。常無厭足。五十七世尊面輪修廣得所。皎潔光淨。如秋滿月。五十八世尊顏貌舒泰。光顯含笑。先言唯

向不背。五十九世尊面貌。光澤熙怡。遠離顰蹙。青赤等過。六十世尊身支。清淨無垢。常無臭穢。六十一世尊所有諸毛孔中。常出如意微妙之香。六十二世尊而門。常出最上殊勝之香。六十三世尊首相。周圍妙好。如末達那。亦如天蓋。六十四世尊身毛。紺青光澤。如孔雀項。紅輝綺飾。色類赤銅。六十五世尊法音。隨衆大小。不增不減。應現無差。六十六世尊頂相。無能見者。六十七世尊手足。指約分明。莊嚴妙好。如赤銅色。六十八世尊行時。其足去地。如四指量。而現印文。六十九世尊自持。不待他衛。身無傾動。亦不透迤。七十世尊威德。遠震一切惡心。見喜恐怖。見安。七十一世尊音聲。不高不下。隨衆生意。和悅與言。七十二世尊能隨諸有情類。言音意樂。而爲說法。七十三世尊一音演說正法。隨有情類。各令得解。七十四世尊說法。咸依次第。必有因緣。言無不善。七十五世尊等觀諸有情類。讚善毀惡。而不愛憎。七十六世尊所爲。先觀後作。軌範具足。令識善淨。七十七世尊相好。一切有情。無能觀盡。七十八世尊頂骨。堅實圓滿。七十九世尊顏容。常少不老。好巡舊處。八十世尊手足。及胸臆前。俱有吉祥。喜旋德相。文同綺畫。色類丹珠。善現是名八十隨好。但經結次在後云。是爲一二等。今迴次在前。意不欲具如經文耳。若瑜伽說。與上有異。今當更說。論云。如來八十種好。謂兩手足。具二十指。及以節爪。並皆殊妙。是卽名爲二十隨好。兩手兩足。表裏八處。手四足四。並皆殊妙。卽名爲八種隨好。兩踝膝股。六處殊妙。是卽名爲六種隨好。兩臂肘腕。六處殊妙。是卽名爲六種隨好。腰膝殊妙。各一隨好。兩核殊妙。爲二隨好。陰藏殊妙。爲一隨好。兩臀殊妙。爲二隨好。腕臚臍三。並皆殊妙。各一隨好。腕尻也。臚呂於反。胸腹前後。是也。兩脇腋乳。並皆殊妙。爲六隨好。腹胸項脊。各一隨好。如是所說。除頸已上。於下身分。六十隨好。上

下齒勢。並皆殊妙。爲二隨好。其齒勇出行列。猶如花鬢。故名勢也。齶腭殊妙。爲一隨好。齶者。壙也。齒所居處。腭謂虛腭。兩唇眷屬。並皆殊妙。爲二隨好。頤蓋圓滿。爲一隨好。兩頰圓滿。善安其所。爲二隨好。兩目眷屬。並皆殊妙。爲二隨好。兩眉殊妙。爲二隨好。其鼻二孔。並皆殊妙。爲二隨好。其額殊妙。爲一隨好。角鬢兩耳。並皆殊妙。爲四隨好。頭髮殊妙。爲一隨好。如是所說。從頸已上。二十隨好。總合說爲八十隨好。若依無上依經。亦有八十。與大般若大同。恐繁不引。然釋此相。瑜伽之中。乃有二門。一列名。二辨釋。初中。上瑜伽。但列名而已。二辨釋。中論更有五門。一相好起位。二相好之因。三相好位差。四相好廢立。五相好優劣。初起位者。論云。如是諸相。及諸隨好。若諸菩薩。入淨勝意樂地時。以得異熟。從此已上。諸相隨好。展轉獲得殊勝清淨。二明因者。大同涅槃前疏。已引三位差別者。論云。當知如是三十二相八十隨好。菩薩在種性地。唯有種子。依身而住。菩薩若在勝解行地。始能修彼。能得方便。若在清淨增上意樂地中。乃名爲得。若在諸餘上地。如是相好。轉勝清淨。若在如來到究竟地。當知相好。善淨無上。四廢立者。論云。如是諸相。是有色。故劣。中勝品。諸有清淨。易了知。故餘有一切不共佛法。皆得名爲大丈夫相。唯立此爲大丈夫相。又卽如是三十二種大丈夫相。由所依性。爲任持。故釋曰。此三十二。與餘功德。爲所依。故偏得立名。餘不得名下。辨好。論云。由極殊妙。令端嚴。故說名隨好。五優劣者。至隨好品。當廣分別。

願一切衆生。得如來身。究竟清淨。不可限量。願一切衆生。得堅固身。一切魔怨。所不能壞。願一切衆生。得一相身。與三世佛。同一身相。願一切衆生。得無礙身。以淨法身。徧虛空界。

願一切衆生得菩提藏身。普能容納一切世間。

疏十云。菩提藏身者。如出現品。如來成正覺時。於其身中。普見一切衆生。成正覺等故。鈔普見一切等者。等有二義。一等下文云。乃至普見一切衆生。入涅槃。皆同一性。所謂無性。無何等性。所謂是無相性。無盡性。無生性。無滅性等。二等取次下經云。佛子。菩薩應知如來身。一毛孔中。有一切衆生數等諸佛身。亦卽身藏之義。上則普含衆生。此則但含諸佛。上全身含。今一毛含。徧法界。毛當知亦爾。故身為藏。

是爲菩薩摩訶薩。求一切智。施髓肉時。善根迴向。爲令衆生。皆得如來究竟清淨。無量身故。佛子。菩薩摩訶薩。以心布施諸來乞者。如無悔厭。菩薩無礙王菩薩。及餘無量諸大菩薩。

疏三十五施心。初施行。

以其自心施乞者時。學自在施心。修一切施心。習行檀波羅蜜心。成就檀波羅蜜心。學一切菩薩布施心。一切悉捨無盡心。一切悉施慣習心。荷負一切菩薩施行心。正念一切諸佛現前心。供養一切諸來乞者。無斷絕心。

菩薩摩訶薩。如是施時。其心清淨。爲度一切諸衆生故。爲得十力菩提處故。爲依大願而修行故。爲欲安住菩薩道故。爲欲成就一切智故。爲不捨離本誓願故。

疏二迴向行中。先辨意。後顯願。有二十心。

以諸善根如是迴向。所謂願一切衆生得金剛藏心。一切金剛圍山等所不能壞。

疏初云金剛藏者。藏卽名堅。其猶樹藏。金剛亦堅。卽佛地智。世法莫壞。如不思議品。十種勇健法中。第一法說。鈔藏卽名堅者。此卽十地。初釋金剛藏論文。如不思議品者。經云。謂一切諸佛。身不可壞。命不可斷。乃至云。八部天龍。盡其勢力。兩大金剛山。如須彌山。及鐵圍山。徧於三千大千世界。一時俱下。不能令佛心有驚怖。乃至一毛。亦不搖動。

願一切衆生。得卍相。莊嚴金剛界心。

疏二中外標卍相。表萬德吉祥。內智契如名金剛界。界者性也。由契性故。堅如金剛。不可損壞。由成智故。利如金剛。壞難壞惑。故十地受職分。內名金剛莊嚴。臆德相。不思議法品及離世間。皆有此心。名大同也。第九迴向。及離世間。又名金剛界根。金剛燄根。亦卽此名。以清淨心王。於無分別智。有所依增上義。故立以根稱。

得無能動搖心。得不可恐怖心。得利益世間常無盡心。得大勇猛幢智慧藏心。

疏其大勇猛幢。取降伏義。

得如那羅延堅固幢心。

疏言堅固幢。取不爲他壞義。

得如衆生海。不可盡心。得那羅延藏。無能壞心。得滅諸魔業。魔軍衆心。得無所畏心。得大威德心。得常精進心。得大勇猛心。得不驚懼心。得被金剛甲冑心。

疏被金剛甲。是大誓義。

得請菩薩最上心得成就佛法菩提光明心得菩提樹下坐安住一切諸佛正法離諸迷惑
得成就十力心。

疏餘並可知。

是爲菩薩摩訶薩。布施心時善根迴向。

爲令衆生不染世間具足如來十力心故。

佛子菩薩摩訶薩。若有乞求腸腎肝肺悉皆施與。如善施菩薩降魔自在王菩薩及餘無量諸大菩薩。

疏三十六施腸腎肝肺四事合一迴向。前有大小二腸今合爲一腸。

行此施時見乞者來其心歡喜以愛眼觀爲求菩提隨其所須悉皆施與心不中悔觀察此身無有堅固
我應施彼取堅固身復念此身尋卽敗壞見者生厭狐狼餓狗之所噉食此身無常會當棄捨爲他所食
無所覺知佛子菩薩摩訶薩作是觀時知身無常穢污之極於法解悟生大歡喜敬心諦視彼來乞者如
善知識而來護想隨所乞求無不惠施以不堅身易堅固身。

佛子菩薩摩訶薩如是施時所有善根悉以迴向願一切衆生得智藏身內外清淨願一切衆生得福藏
身能普任持一切智願願一切衆生得上妙身內蘊妙香外發光明願一切衆生得腹不現身上下端直
支節相稱願一切衆生得智慧身以佛法味充悅滋長願一切衆生得無盡心修習安住甚深法性願一
切衆生得陀羅尼清淨藏身以妙辨才顯示諸法願一切衆生得清淨身若身若心內外俱淨願一切衆
生得如來智深觀行身智慧充滿雨大法雨願一切衆生得內寂身外爲衆生作智幢王放大光明普照

一切。

疏言智藏身者。身為智依故。餘可知。

是為菩薩摩訶薩。施腸腎肝肺善根迴向。為令衆生內外清淨。皆得安住無礙智故。

